

四庫全書

史部

欽定四庫全書

浙江通志卷一百九十五

寓賢

下

紹興府

漢

梅福

漢書本傳字子真九江壽春人少學長安明尚書穀梁春秋為郡文學補南昌尉是時成帝委

任大將軍王鳳王氏寢盛福上書譏切王氏不見納元始中王莽顛政福一朝棄妻子去九江傳以為仙其後有人見福於會稽變名姓為吳市門卒云

**袁忠**

後漢書袁安傳忠汝南汝陽人安之元孫與同郡范滂為友同陷獄得釋初平中為沛相乘輦

舟到官以清亮稱及天下亂棄官客上虞嘗乘舟戴笠詣太守王朗見朗駙從繁麗鄙之即辭去後

徵為衛尉未至卒子祕擊

黃巾賊戰死詔旌其門

**許靖**

河南通志字文休平輿人於越新編靖舉孝廉與從兄邵俱有人倫之鑒董卓亂隱會稽後仕

蜀累官

太傅

**陸瓊**

江南通志字仲芳毘陵人明京氏易尚書尤精風角星算辟主簿謝病去隱會稽山

**蔡邕**

後漢書本傳字伯喈陳留圉人少博學好辭章數術天文妙操音律桓帝時五侯擅恣聞邕善

鼓琴遂白天子勅陳留太守督促發遣邕不得已行到偃師稱疾而歸邕慮卒不免乃亡命江海遠

跡吳會吳人有燒桐以爨者邕聞火烈之聲知其良木因請而裁為琴果有美音而其尾猶焦故時人名曰焦尾琴注張騫文士傳邕告吳人曰吾昔嘗經會稽高遷亭見屋椽竹東間第十六可以為笛取用果有異聲兩浙名賢錄邕書曹娥碑陰八字云黃絹幼婦外孫董白即其時也

桓騰

兩浙名賢錄字文林龍亢人榮之五世孫舉孝廉方正皆不應初中避地會稽止故魯相鍾

離意舍越人化其節閭里不爭訟太守王朗給服食牛羊悉不受

孔潛

於越新編潛本宣聖十七代孫漢末避地會稽孔道隆孔覲皆其後也今世為山陰人

三國

王肅

三國志王朗傳肅字子雍東海郡人輿地志王朗為會稽太守子肅隨之郡住東齋中夜有女

子從地出稱越王女與語達旦臨別贈墨一丸  
肅方注周易多有滯思因此便覺才思開悟

晉

王羲之

晉書本傳字逸少司徒導之從子年十三嘗  
謁周顛顛察而異之尤善隸書為古今之冠

論者稱其筆勢以為飄若浮雲矯若驚龍起家祕  
書郎征西將軍庾亮稱羲之清貴有鑒裁遷寧遠  
將軍江州刺史羲之既少有美譽朝廷愛其才頻  
召為侍中吏部尚書皆不就乃以為右軍將軍會  
稽內史時殷浩與桓溫不協羲之以國家之安在  
於內外和因與浩書以誠之及浩將北伐羲之以  
書止之言甚切至浩果敗時東土饑荒羲之輒開  
倉賑貸朝廷賦役繁重吳會尤甚羲之尤上疏爭  
之雅好服食養性初渡浙江便有終焉之志會稽  
有佳山水名士多居之謝安未仕時亦居焉孫綽

許詢李充支遁等皆以文義冠世並築室東土羲之嘗與同志宴集於會稽山陰之蘭亭自為序以中其志性愛鸞山陰道士養好鸞羲之往觀意甚悅固求市之道士云為寫道德經當舉羣相贈耳羲之欣然寫畢籠鸞而歸嘗在戴山見一老姥持六角竹扇賣之羲之書其扇各為五字姥初有慍色因謂姥曰但言是王右軍書以求百錢姥如其言人競買之他日姥又持扇來羲之笑而不答既去官與東土人士盡山水之游弋釣為娛又與道士許邁共修服食採藥石不遠千里徧游東中諸郡窮諸名山泛滄海年五十

九卒有七子知名者五人

**謝安**

晉書本傳字安石年四歲時桓彝見而嘆曰此兒風神秀徹後當不減王東海及總角神識沉

敏風宇條暢王導亦深器之初辟司徒府除佐著作郎並以疾辭寓居會稽與王羲之及高陽許詢

桑門支遁游處出則漁弋山川入則言咏屬文無處世意常往臨安山中坐石室臨澹谷悠然嘆曰此亦伯夷何遠既累辟不就安妻劉悅妹也見家門富貴而安獨靜退乃謂曰丈夫不如此也安掩鼻曰恐不免耳始有仕進意時年已四十餘征西大將軍桓溫請為司馬頃之徵拜侍中遷吏部尚書尋為尚書僕射加後將軍及中書令王坦之出為徐州刺史詔安總閱中書事安義存輔導時疆敵寇境邊書續至安鎮以和靖馭以長算德政既行文武用命不存小察弘以大綱威懷外著人皆比之王導謂文雅過之苻堅強盛疆場多虞安遣弟石及兄子玄等應機征討所在尅捷拜衛將軍開府儀同三司封建昌縣公性好音樂期喪不廢又於土山營墅樓館林竹甚盛每攜中外子姪往來游集安雖受朝寄然東山之志始末不渝每形於言色雅志未就遂遇疾篤乃上疏遜位尋薨

贈太傅謚文靖二子瑤琰  
瑤襲爵官至瑯琊王友

謝玄

嶧縣志字幼度為叔父安所器重授散騎常侍  
會稽內史初玄父奕為剡令樂其山水有寓居  
之意玄因歸剡嶠山東北太康湖於江曲起樓  
樓側桐梓森鬱人號桐亭卒謚獻武葬始寧

戴逵

晉書本傳字安道譙國人少博學好談論善屬  
文能鼓琴工書畫其餘巧藝靡不畢綜總角時  
以雞卵汁溲白瓦屑作鄭玄碑又為文而自鐫之  
詞麗器妙時人莫不驚歎太宰武陵王晞聞其善  
鼓琴使人召之逵對使者破琴曰戴安道不為王  
門伶人後徙居會稽之剡縣性高潔嘗以禮度自  
處深以放逵為非道乃為著論孝武帝時以散騎  
常侍國子博士累徵辭不就郡縣數敦逼不已乃  
逃於吳吳國內史王珣有別館在武邱山逵潛詣  
一游處積旬會稽內史謝玄慮逵遠遯不反上疏



曰伏見譙國戴遠希心俗表不嬰世務雖策命屢加幽操不回陛下既已愛而器之宜使其身名並存請絕其召命帝許之遠復還剡後王珣為尚書僕射上疏復請徵為國子祭酒散騎常侍復不至太元十二年病卒長子勃有父風義熙初以散騎常侍徵不起

**王修齡**

世說名胡之常寓東山甚貧乏陶範為烏程令以米遺之不受直答云王修齡若饑自當

就謝仁祖索食不須陶胡奴米

**孫統**

晉書孫楚傳楚孫統字承公太原中都人幼善屬文征北將軍褚裒聞其名命為參軍辭不就家於會稽性好山水乃求為鄞令居職不留心碎務縱意游肆名山勝川靡不窮究後為餘姚令卒子騰嗣以博學著稱位至廷尉騰弟登少善名理注老子行於世仕至尚書郎

孫綽

晉書孫楚傳綽字興公博學善屬文少與高陽許詢俱有高尚之志居會稽游放山水作遂初

賦以致其意所居齋前種一株松恒自守護隣人謂之曰樹子非不楚楚可憐但恐永無棟梁日耳綽答曰楓柳雖復合抱亦何所施耶嘗作天台山賦辭致甚工以示友人范榮期云卿試擲地當作金石聲徵拜太學博士遷散騎常侍領著作郎時大司馬桓溫將移都洛陽朝廷畏溫不敢為異人情疑懼並知不可莫敢先諫綽乃上疏桓溫見綽表不悅曰何不尋君遂初賦知人家國事耶尋轉廷尉卿領著作於時文士綽為其冠溫王郗庾之薨必須綽為碑文然後刊石焉

許詢

兩浙名賢錄字玄度高陽人父敗為會稽內史因家焉詢有才藻善屬文能清言與太原孫綽齊名隱居不仕築室永興之南山蕭然自放一時名士無不傾慕劉悛嘗曰清風明月輒思玄度後

終於剡山天中記許詢徵司徒掾不就乃杖策披裘憑樹構堂常與沙門支遁謝安石等同遊

**阮裕**

晉書阮籍傳裕字思曠陳留尉氏人居會稽剡縣拜臨海太守少時去職復除東陽太守尋徵

侍中不就還剡山有肥遯之志有以問王羲之羲之曰此公近不驚寵辱雖古之沉冥何以過此在剡曾有好車借無不給人葬母意欲借而不敢言後裕聞之乃嘆曰吾有車而使人不敢借何以車為遂焚之久之復徵散騎常侍金紫光祿大夫並無所就或問裕曰子屢辭徵聘而宰二郡何邪裕曰屢辭王命非敢為高也吾少無宦情兼拙於人間既不能躬耕自活必有所資故曲躬二郡耳

**孫盛**

晉書本傳字安國太原中都人父恂潁川太守在郡遇賊被害盛年十歲避難渡江及長博學

善言名理於時殷浩擅名一時與抗論者惟盛而已盛嘗詣浩談論對食奮擲塵尾毛悉落飯中食

冷而復暖者數四至暮忘食理竟不定由是知名起家佐著作郎桓溫伐蜀以盛為叅軍賜爵安懷縣侯出補長沙太守篤學不倦自少至老手不釋卷著晉陽秋詞直理正咸稱良史兩浙名賢錄盛渡江居於會稽

## 南北朝

### 王弘之

宋書本傳字方平瑯琊臨沂人少孤貧為外祖徵士何准所育從叔獻之及太原王恭並

貴重之性好山水求為烏程令尋以病歸荊州刺史桓偉請為南蠻長史義熙初年何無忌又請為右軍司馬高祖命為徐州治中從事史除員外散騎常侍並不就家在會稽上虞從兄敬弘為吏部尚書奏為庶子不就又陳弘之高行苦節宜招空谷以敦沖退之美元嘉四年徵為通直散騎常侍

又不就敬弘常解貂裘與之即着以采藥性好釣上虞江有一處名三石頭弘之常垂綸於此經過者不識之或問漁師得魚賣否弘之曰亦自不得得亦不賣日夕載魚入郭經親故門各以一兩頭置門內而去始寧汰川有佳山水弘之依巖築室謝靈運顏延之並相欽重卒年六十三

### 孔淳之

南史本傳字彥深魯人也少高尚愛墳籍居會稽剡縣性好山水每有所遊必窮其幽峻或旬日忘歸除著作佐郎太尉參軍並不就居喪至孝廬於墓側服闋與徵士戴顓王弘之王敬弘等共為人外之遊會稽太守謝方明苦要之不能致使謂曰苟不入吾郡何為入吾郭淳之笑曰潛游者不識其水巢棲者非辨其林飛沉所至何問其主終不肯往茅室蓬戶庭草蕪徑惟床上有數帙書元嘉初復徵為散騎常侍侍郎乃逃於上虞縣界家人莫知所在

阮萬齡

宋書本傳陳留尉氏人少知名自通直郎為

孟昶建威長史時袁豹江夷相繼為昶司馬

時人謂昶府有三素望萬齡家在會稽剡縣頗有

素情永初末自侍中解職東歸徵為祕書監加給

事中不就元嘉二十

五年卒年七十二

何胤

梁書本傳字子季點之弟也廬江瀟人師事沛

國劉瓛受易及禮記毛詩又入鍾山定林寺聽

鬱林嗣位胤為后族甚見親待胤雖貴顯常懷止

足建武初已築室郊外恒與學徒游處其內至是

遂賣園宅欲入東山拜表辭職詔許之胤以會稽

山多靈異往遊焉居若邪山雲門寺初胤二兄求

點並棲遁求先卒至是胤又隱世號點為大山胤

為小山求曰東山永元中徵太常不就高祖踐阼

詔為特進光祿大夫遣領軍司馬王果宣旨諭意

果至着單衣廢巾執經卷下床跪受詔書因謂果曰吾年已五十七月食四斗米不盡何容得有宦情果還奏聞乃勅聚徒受業於是遣何子朗孔壽等於東山受學胤以若耶迫隘不容生徒乃遷秦望山山有飛泉西起學舍即林成援因巖為堵別為小閣室寢處其中躬自啟閉童僕無得至者還吳居虎邱西寺學徒復隨之大通三年卒年八十六

**王籍**

梁書本傳字文海瑯琊臨沂人七歲能屬文及長好學博涉有才氣樂安任昉見而稱之嘗於

沈約坐賦詠得燭甚為約賞天監初除安南王主簿歷餘姚錢塘令並以放免久之除相東王諮議叅軍隨府會稽郡境有雲門天柱山籍嘗游之或累月不返至若耶溪賦詩其畧云蟬噪林逾靜鳥鳴山更幽當時以為文外獨絕還為大司馬從事中郎遷中散大夫卒

# 江總

陳書本傳字總持濟陽考城人幼聰敏有至性  
及長篤學有辭采家傳賜書數千卷總晝夜尋

讀未嘗輟年十八解褐丹陽尹何敬容開府除敬  
容府主簿遷尚書殿中郎范陽張纘瑯琊王筠南  
陽劉之遴並高才碩學雅相推重為忘年交侯景  
寇東都總避難會稽郡憇龍華寺乃製修心賦其  
畧云太清四年秋七月避地於會稽龍華寺此伽  
藍者余六世祖宋尚書僕射州陵侯元嘉二十四  
年之所構也侯之王父晉護軍將軍彪昔蒞此邦  
卜居山陰都賜里貽厥子孫有終焉之志寺域則  
宅之舊基左江湖面山背壑東西連跨南北縈  
紆聊與苦節名僧同銷日月曉修經戒夕覽圖書  
寢處風雲憑樓水月情可知矣元帝平侯景徵為  
明威將軍始興內史陳天嘉四年以中書侍郎徵  
還朝入隋為上開  
府開皇十四年卒



**辛普明**

於越新編河南人僑居山陰少就闕康之受業家貧與兄共處一帳兄亡以帳圍柩蚊多

不得寢處之怡然及葬鄉人爭以金賻後至者不復受人問之答曰本以兄墓不周故不逆親友之意今葬費已足豈可利餘贈耶徵為議曹從事不就

**王知元**

陳書孝行傳高宗世有太原王知元者僑居於會稽剡縣居家以孝聞及丁父憂哀毀而

卒高宗嘉之詔改其所居清苦里為孝家里

**唐**

**李白**

唐書本傳字太白其先隋末以罪徙西域神龍初遁還客巴西白之生夢長庚星因以命之十

歲通詩書既長隱岷山州舉有道不應喜縱橫術擊劍為任俠輕財重施更客任城與孔巢父韓準

裴政張叔明陶沔居徂徠山號竹溪六逸天寶初南入會稽與吳筠善筠被召故白亦至長安往見賀知章知章見其文嘆曰子謫仙人也言於玄宗召見金鑿殿供奉翰林

朱放

全唐詩選傳字長通襄州人隱於越之剡溪嗣曹王臯鎮江西辟節度叅謀貞元初召為拾遺

不就

陸參

兩浙名賢錄字公佐吳郡人蚤孤與兄隱居於會稽有佳山水率子弟耕汲其中因修桑門之

法擯落人事貞元初兄既歿始為宗姻士友所強慨然有應世之心由試佐環衛歷大理評事攝監察御史後徵拜祠部員外郎出為歙州刺史參為人器度夷遠同心定交造次以之從善親仁發於肺腑文章弘

朗有作者風

齊抗

嶠縣志字遐舉高陽人少值天寶亂奉母居會稽初棲剡嶺後遷玉笥山未二紀而登台鉉

李紳

全唐詩錄傳字公垂亳州人嶠縣志貞元十八年紳為布衣東遊天台過剡令崔某座中有僧

修真謂曰君異日必當鎮此修子所居元和三年紳以前進士為故薛華常侍招致越中真已卧疾使人相告幸勿忘前言太和癸丑紳以檢校左騎省廉察蒞越果符其言僧徒悉殂謝寺更頽毀因捐錢三十萬率諸僚施俸以飾寺宇工成紳有龍藏寺記

宋

劉安世

宋史本傳字器之魏人登進士第不就選從學於司馬光咨盡心行己之要光入相薦為

祕書省正字後宣和六年待制中書舍人安世儀狀魁碩音吐如鐘正色立朝扶持公道一時無不

敬懼家居未嘗有惰容久坐身不傾倚作字不草書不好聲色貨利其忠孝正直皆則象司馬光年既老名賢畧盡而歸然獨存名望益重成化新昌縣志安世母太常博士新昌石亞之女故自幼游

學新昌石溪義塾

### 韓肖胄

宋史本傳字似夫祁州安陽人以蔭補承務郎徽宗問其家世賜同上舍出身紹興三年

拜端明殿學士充通問使至金國金人知其家世甚重之往返纔半年與朱勝非議不合力求去以舊職知温州提舉臨安府洞霄宮五年除資政殿學士知紹興府尋奉祠與其弟應胄寓居於越幾十年事母以孝

聞卒諡元穆

### 夏榮

萬厯上虞縣志字子顯世居汴梁以詩禮名家  
就武職高宗南渡扈駕東征高橋之戰身被

五十餘創忠憤益奮大呼而進金兵大敗遁去封兩浙制置使守越後退老上虞謚曰英

### 周靖

李大同周博士墓誌字天錫先本南康人幼通敏好古善屬文舉宣和進士主中江簿轉郴州

錄事過於守帥多掣肘靖守法不阿常預內銓已而靖康之亂乃以宗社大計闡白大臣欲投書闕下當事者沮之靖知勢不可為遂棄歸紹興間薦章交上遂起為國子正錄進本監博士三舍弟子業成而仕後多知名居無何力丐罷官得諸暨意其有中州風遂徙居之

### 尹焞

宋史本傳字彥明世為洛人少師事程頤嘗應舉發策有誅元祐諸臣議焞曰噫尚可以干祿

乎哉不對而出於是終身不就舉靖康初召至京師賜號和靖處士紹興八年除太常少卿未幾稱疾九年以徽猷閣待制兼侍講召又辭秦檜當國見焞議和疏不樂遂不復留於越新編焞塔邢純

迎養於越卒因葬焉今其祠在大夫橋榜曰古小學

### 程迥

宋史本傳字可久寧陵人靖康之亂徙紹興之餘姚孤貧漂泊無以自振二十餘始知讀書時

西北士大夫多在錢塘迥得以考德問業焉登隆興元年進士所著有易傳外傳春秋傳顯微例目

論語傳孟子章句文史評經史說諸論辨卒官朝奉郎

### 曾志

東都事畧字仲常鞏之孫補太常內舍生以父任郊社齋郎累官司農丞通判温州須次於越

金人陷越以琶八為帥約詰旦文武官並詣府有不至及藏密不覺察者皆死志獨不往為隣人糾察逮捕詞氣不屈時金人帳中執兵者皆愕眙相視琶八曰且令出左右盡驅其家屬四十口同日殺之越南門外越人作窖瘞其屍金人去志弟朝散郎忌知杭州餘杭縣置大棺斂其骨葬天柱山

胡直孺

兩浙名賢錄字少汲華林人紹聖間進士累遷工部尚書郎以龍圖閣學士知洪州率兵

禦金人於營邱斬首千級高宗即位赴行在改刑部尚書奉勅治會稽攢宮因留家焉卒葬雲門曰

水塘有西山

老人集行世

王侯

兩浙名賢錄字碩夫宛邱人政和二年進士歷監察御史建炎初扈蹕南渡遂家餘姚召拜右

司員外郎紹興初命左右條具改正崇觀以來濫恩諸失職者為飛語上聞免官秦檜專國侯家居

一十八年檜死起知明州  
歷工部尚書尋乞身歸

王琰

萬歷紹興府志字剛夫臨川人父榕為諸暨令遂家焉敏悟絕人博洽墳典由分寧尉累遷知

衡州所至有聲胡銓嘗薦之有曰治經有行亞西漢之名儒悃悃無華實東都之循吏兄瑊字寶臣

知通州行業

與琰齊名

宋延祖

兩浙名賢錄字嗣宗濟南人建炎南渡因家上虞紹興中登進士官國子主簿除權給事

繳駁奏論無顧避改諫議大夫兼侍讀遷兵部尚書延祖以公忠受知不三年而登八座自謂遭時

遇主知無不言以謹直稱

陳知柔

福建通志永春人紹興進士授台州判官與秦檜子同榜檜當軸前列十餘人以扳援致

通顯知柔獨不阿附以故齟齬雅好山水自天台至會稽耽其巖壑留二年所著有易本旨易大傳

春秋義例詩聲譜論語後傳詩話古賦雜著

曾幾

傳詳名宦宋史本傳初家河南紹興末官浙東因居越禹跡寺未幾擢其子逮為浙西提刑迎



養於官卒葬  
山陰鳳凰山

羅從彥

於越新編字仲素南劍人聞楊時得程氏學慨然慕之時令蕭山從彥徒步往從之即驚

汗浹背曰不至是幾虛過一生矣久之卒業學者稱豫章先生

王希呂

傳詳名宦兩浙名賢錄希呂移家會稽貧不能廬寓僧舍孝宗聞之賜地一區錢六百萬

紹令有司治第於越之東隅子孫世居焉即今所稱後衙池也

孟載

兩浙名賢錄鄒國四十八代孫高宗時扈駕南渡授環衛上將軍家諸暨卒贈太尉

高世則

山陰縣志字仲貽汴人扈從高宗南渡領越州觀察使紹興改元除保靜軍承宣使提舉

萬壽觀詔令編類元帥府事蹟寓居越州山陰之禹會鄉帝遣中使時給俸祿後加少保開府溫州

子千之祕閣修  
撰世家於越

**張孝伯**

萬曆紹興府志歷陽人父寺丞寓蕭山因家焉孝伯登進士仕至同知樞密院事嘉泰四

年進叅知政事尋罷歸時韓侂胄方嚴偽學之禁  
貶斥正人無虛日孝伯謂侂胄曰不弛黨禁恐後  
不免報復之禍侂胄然之自  
是黨禁寢解正人始有所容

**言通**

兩浙名賢錄字宗文本吳人文學子游之裔咸  
淳二年以敷文閣學士知紹興悅其山水之秀

遂卜居北鄉子

孫遂為山陰人

**王銍**

兩浙名賢錄字性之汝陰人寓居剡中善屬文  
不樂仕進讀書五行俱下藏書滿架既卒秦檜

子熹屬部將索所藏書許官其子銍子泣拒  
之曰願守此書以死不願官也熹竟不能奪

元

幹勒海壽

萬歷紹興府志字允常河南人後家山陰剛正有志節拜監察御史劾奏殿中侍御

史哈瑪爾及其弟舒蘇罪惡直聲震中外官至浙東廉訪使

貢性之

江南通志字友初師泰之子明初徵錄師泰後有以性之薦者性之改名悅避居會稽耕漁自給邑人芮麟嘗遇之邀與俱歸辭以詩云遊絲落絮都成恨社燕秋鴻各自飛既卒門人私謚

之曰貞晦先生

鐺渙

列朝詩集字彥亨號石田世家雒陽後為越人通毛氏詩至正間御史林與薦為三茅書院山

長道梗不赴老以詩酒自娛子績孫師邵皆有才名

戴時才

兩浙名賢錄字仲文鄱陽人至正間薄遊兩淮買舟南下渡錢塘觀胥濤直抵蕭山探五

洩之奇遂忘身世竟卜居相湖之濱以登涉吟咏自娛人稱為南坡老人

明

邵伯正

兩浙名賢錄汴人洪武初徙家嵯縣由鄉舉為南京戶部員外郎以廉能稱尋有令江浙

人不得官戶部遂謝事歸杜門好書善敦族明宗纂敘圖系剡俗為之歸厚云

高啟

紹興府志字季迪姑蘇人為吳下詩宗元季避地蕭山後還姑蘇其詩文有岳鳴槎軒等集

蔡運

會稽縣志南康人以貢起家歷官四川叅政清動直諒不諧於俗罷歸壬午靖難後難髮為僧

至會稽雲門寺寓焉紹興府志寓雲門寺不言其由每從一童子攜茗具筆牀泛舟四遊賦詩滿袖

歸則焚之

不雷一字

耶溪樵者

會稽縣志永樂初一樵者寓耶溪日驚薪兩束食足則已食已往畫詩溪沙上畫已

輒亂其詩人怪之表忠錄名廖平襄陽人建文時官兵部侍郎

黃省曾

名山藏字勉之吳人以詩經魁南都舉進士不第遂棄去自號五岳山人是時王守仁講

學越中省曾遊餘姚執贄道席每班坐請疑問至即答無不洞中生平不樂組綬杜門著書海內名者若李夢陽康海王廷相楊一清霍韜輩或以翰札見知或以經濟加器聲噪一時

高弘圖

會稽縣志山東人萬歷戊戌進士講學東林寓居會稽明末絕粒死

姜琛

會稽縣志字如農山東萊陽人崇禎辛未進士屢遷吏部給事中時內豎指斥東林倪元璐等

塚奏是小人傾陷君子帝大怒子杖劉宗周疏救  
謫戍邊海赦歸同弟瑛奉母寓會稽章聞家曲盡  
養孝

## 國朝

王正中

餘姚縣志字仲撫保定人崇禎丁丑進士知  
餘姚因家焉正中不事文彩好讀實用之書  
從閩人柯仲炯受天官  
之學談之往往有驗

蔣平階

紹興府志字大鴻華亭人明末華亭夏允彝  
青浦陳子龍主幾社見平階大驚亟邀入社  
後服黃冠假青烏之術東至齊魯登泰岱謁孔林  
轉徙吳越間樂會稽山水遂家焉詩文詳贍典麗  
以西京盛唐為要歸於書博覽洞究無遺  
著書十餘種卷以百計歿葬若耶樵風涇

台州府

晉

李廙

世說字宗子江夏鍾武人清貞有遠操少羸病不肯婚宦居在臨海住兄侍中墓下既有高名

王丞相欲招禮之辟為府掾廙得賤命笑曰茂弘乃復以一爵加人湖廣通志廙好學善草隸足疾不能行常仰臥彈琴讀書不輟

江迥

晉書本傳字道載陳雷圍人避蘇峻之亂屏居臨海翦茅結宇耽翫載籍有終焉之志中軍將

軍殷浩將謀北伐請為諮議參軍甚重之遷長史甚為匡弼之益軍中書檄皆以委迥及桓溫奏廢浩佐吏迥遂免昇平中遷吏部郎兼侍中累讓不許迥在職多所匡諫著阮籍序贊逸士箴及詩賦

奏議數十篇行於  
世子蔚吳興太守

### 南北朝

#### 庾肩吾

兩浙名賢錄新野人南齊庾信之父隱居天台信畱周歲雖致通顯每多鄉閭之思故作哀江南賦以致其意有云少微真人天台逸民階庭空谷門巷蒲輪移談講樹就簡書筠降生世德載誕貞臣文詞高於甲觀模楷盛於漳濱蓋頌父也

#### 王元規

南史本傳字正範太原晉陽人八歲而孤隨母依舅氏住臨海郡性孝事母甚謹晨昏未嘗離左右時山陰縣有暴水漂流居宅元規惟有一小船倉卒引其母妹并姑姪入船元規自執櫂棹而去畱其男女三人間於樹杪及水退俱獲全時人稱其至行任梁位中軍陳天嘉中領國子助



敬入隋卒於秦  
王府東閣祭酒

唐

王展

天台山方外志不知何許人寓天台項斯有懷  
王展詩云赤城山下路無計得相隨嘗撰白郎

巖記

謹案天台方外志寓賢中載唐周朴泉州人寓天  
台死黃巢之亂查全唐詩錄朴吳興人避地福州  
黃巢寇閩欲降之不從遂見害是朴本浙人流寓  
閩中非閩人寓浙也舊通志作周弁更謬今刪

曹唐

全唐詩錄傳字堯賓桂州人天台山方外志寓  
天台以能詩名後為荆湘從事賦桃源詩膾炙

人口人

任藩 書目解題藩或作翻客居天台有宿恰  
憤山絕句為人所稱今城中巾子山也

宋

呂頤浩

傳詳名宦赤城志頤浩其先  
樂陵人建炎四年寓臨海

韓昭

赤城志字用晦真定人丞相續之曾孫官至直  
顯謨閣自號大同居士紹興初避地仙居仙居

縣志昭隱  
於安州山

陳與義

宋史本傳字去非洛陽人登政和三年上舍  
甲科紹興元年知湖州七年參知政事上曰

今梓宮與太后淵聖皆未還若不與金議和則無  
可還之理與義曰若和議成豈不賢於用兵萬一  
無成則用兵必不免從帝如建康明年扈蹕還臨  
安復知湖州遂請開提舉臨安洞霄宮卒與義長

於詩體物寓興清遠紆餘上下陶謝韋柳之間嘗賦墨梅徽宗嘉賞之以是受知方輿勝覽號簡齋建炎中避

地臨海

**陳瓘**

宋史本傳字瑩中南劍州沙縣人中甲科調湖州掌書記簽書越州判官通判明州徽宗即位

名為右正言左司諫極論蔡卞章惇安惇邢恕之罪遷右司員外郎崇寧中除名瓘嘗著尊堯集謂紹聖史官專據王安石日錄改修神宗史變亂是非不可傳信深明誣妄以正君臣之義張商英為相取其書既上而商英罷徙台州在台五年乃得自便宣和六年卒高宗謂輔臣曰陳瓘昔為諫官甚有讜議所著尊堯集明君臣之大分合於易天尊地卑及春秋尊王之法宜特賜諡以表之諡曰

忠肅

秦崇禮

傳詳名宦尚友錄崇禮退居台州賓客一介之士亦厚禮之故家子弟淪落者推索金以

之濟

范宗尹

宋史本傳字覺民襄陽鄧城人宣和三年進士建炎元年召為中書舍人遷御史中丞拜

參知政事呂頤浩罷相宗尹攝其位時年三十宰相年少未有如宗尹者秦檜擠宗尹遂落職未幾

命知温州  
退居天台

汪藻

傳詳名宦天台縣志建炎中避地居台有道中詩浮溪集

胡世將

宋史本傳字承公常州晉陵人登崇寧五年進士臨海縣志嘗為兵部侍郎建炎中謫居

台州題名巾子山及游天柱寺有詩官終資政殿學士

許仁

天台縣志字性初鉅野人從楊龜山遊登宣和何渙榜進士歷監察御史隨蹕南渡建炎初以

右朝請大夫集英殿修撰知臨安府疏劾黃潛善汪伯彥直道不容於朝因偕修武郎趙士佇遊台山卜居於邑之墨湖建思敬堂金波亭

所著有靈溪新紀編及奏疏若干卷

馮原

台州府志河間人祖寶以武德大夫從高宗南渡父安國以蔭歷官浙東觀察使巡視松門市

舶卒於台賜葬赤城山原為機宜文字官家臨海之長樂鄉

李龜朋

赤城志字才翁長安人與兄龜年齊名中特科監南岳廟紹興末寓居臨海

郭仲荀

赤城志字傅師洛陽人官至太尉慶遠軍節度使殿前都指揮使紹興中流寓臨海

李擢

赤城志字德升奉符人元符三年中第官至禮部尚書徽猷閣直學士紹興初寓臨海

翟汝文

傳詳名宦臨海縣志紹興二年與其子耆年偕來寓兜率寺有丹陽集行於世

賀允中

赤城志字子忱上蔡人歷資政殿大學士叅知政事紹興初寓居天台萬年寺後徙臨海

有應心泉記墓

在天台縣一都

張師正

赤城志字子正大梁人宣和間官至都統制紹興中家於台

蔡向

赤城志字瞻明東平人挺之孫紹興初提舉本路常平因寓臨海自號淨空居士有繪水集藏

於家

姜誥

赤城志字廷言長山人官至寶文閣直學士通議大夫贈少師紹興中寓居臨海子處度知惠

州孫注  
大理丞

成大亨

台州府志字正仲河間人元符二年中第官至左朝請大夫直祕閣紹興初寓天台

桑莊

赤城志字公肅高郵人知柳州紹興初寓天台曾幾志其墓有茹芝廣覽三百卷藏於家子世

昌自號莫莽有

文集三十卷

曹勛

台州府志字公顯陽翟人宣和五年賜甲科以武義大夫從徽宗北遷過河奉徽宗御衣書自

燕山間行詣康王高宗泣以示輔臣勛建議募死士航海入金奉徽宗由海道歸執政難之出勛於外兩赴金國正使何鑄伏地不能言勛反覆開論金主首肯以棹宮及太后歸孝宗朝加太尉贈太師葬臨海顯恩寺北嘉靖浙江通志紹興中寓天台子邦工部郎中知蘄州耘利州觀察使

于恕

太平縣志字忠甫諸城人紹興中以父定遠為州判官寓居邑之桃夏中特科歷官靖安尉昌

國簿受學於張九成九成謫嶺表恕  
裏糧從之尤豪於詩有文集數十卷

### 林景憲

文獻通考東魯林景獻初寓吳興從徐度敦  
立游後為參政賀允中子忱孫塔寓臨海為

人高尚詩清澹五言四韻古句尤佳逼  
陶謝梁溪尤延之誠齊楊廷秀為之序

謹按赤城志作林憲舊浙江  
通志作林憲章未詳孰是

### 楊棟

宋史本傳字元極眉州青城人紹定二年進士  
第二授祕書省正字擢太子詹事兼修國史實

錄拜參知政事台州守王華甫建上蔡書院言於  
朝乞棟為山主詔從之因卜居於台尋奉祠以資  
政殿大學士充萬壽觀使  
所著有崇道集平舟文集

### 謝伋

黃巖縣志字景思上蔡人參政克家之子官至  
太常少卿紹興初侍父寓居靈石後寓三童號



葯寮居士有文集葉水心為序初秦檜罷御批云秦檜不知治體信任匪人人心大搖怨讟載路後檜復柄意札在彼所有旨下台州追索擇酷吏劉景為守視事次日即遣吏追逮彼自分必死將抵郡城坐舟中望景郊迎相見執禮甚恭蓋景已得檜計矣踰旬日假拜處州之命

**楊揆**

黃巖縣志字子才真定人守楚州日秦檜初自金還泛海至楚揆疑其詐欲斬之所親者謂曰萬一果然朝廷知之非便不若津遣赴行在真偽自辨矣於是遣人陰加防護送至會稽檜既相揆屏跡黃巖踰二十年檜死高宗記其姓名召為工部侍郎數天閣待制

**陳良弼**

太平縣志字希說祥符人以父繹恩補內黃門事宣和五年提舉京城增修城濠賜玉帶銀絹高宗於南都正位奔赴行在除寶慶承宣使尋致仕買舟順流而下抵邑境居焉卒贈平信軍

節度使諡忠簡葬  
慶恩寺東有石碑

**洪擬**

傳詳名宦寧海縣志靖康間避  
地寧海遂家焉卒葬縣北項舉

**趙不柔**

天台縣志字正之開封人安康郡王士說之  
子悼其父死靖康之難不樂仕進秦檜當國  
招之不出官至承事郎通判潮州紹興初避地於  
台孫汝遇淳熙十四年中第知吉州汝适慶元二  
年中第提舉福建  
市舶後徙臨海

**李彙**

天台縣志字推之覃懷人紹興九年  
通判州事寓家於台官至朝議大夫

**范開**

台州府志字宣之河陽人為洪邁  
辛棄疾所器重嘉定中寓居冷台

**元**

卜元吉

台州府志河西唐古氏寓天台鄉  
試副榜任慶元路翁洲書院山長

明

東湖樵夫

臨海縣志不知姓名革除間採樵東湖上  
負薪入市口不二價成祖登極詔至臨海

樵夫遂投湖中而死後  
人立亭湖上以祀之

陸修正

黃巖縣志號草屋吳郡人寓居盤馬善  
屬文時人稱為草屋先生有文集行世

王顯

方孝孺漁溪子傳號漁溪子江寧人少脫畧不  
拘讀書不肯事帖括嘗游寓天台與林右張穀

最善右善擊劍長於為文穀放於歌詩二人皆自  
負一世顯嘗釣海濱望見二人踞坐大笑二人者  
知其非庸人也即與之語大驚異相辨難上下古  
今事折衷損益根據理道識者知其非狂生或又

疑其為神

仙中人云

王夔

列朝詩集傳字常宗其先蜀人父官崑山教授  
召修元史賜金幣以母老乞歸夔少孤貧讀書

天台山中師事王真文得蘭溪金文安之傳  
學有端緒嘗著論力詆楊廉夫有三近齋稿

范用修

仙居縣志滇人舉孝廉將試春官會父以非  
罪見斥因不果北上窮山海披霜露崎嶇險

阻越數載方遘父屍歸葬應司寇容巷見其孝以  
女姪妻之為卜築麻姑山麓挈家居焉善畫人得  
其片紙珍

若拱壁

孫震

台州府志字魯山桐城人由進士累官兵部尚  
書明末避地仙居二都方宅後復移寓一都安

寧有烟霞皆物外  
雞犬即仙家之句

孫鼎徵

臨海縣志字調宰號柳漁松江人崇禎時避居臨海能詩善畫有二子任安任昌皆以翰

墨名

金華府

漢

文臺

名勝志字高明嘗討赤眉還誅新莽功成造鐵船遊東海見石帆於永嘉徧歷名山而歿於婺

今白沙村有昭利王廟即此

晉

江惇

晉書本傳字思悛陳畱圍人孝友淳粹高節邁俗性好學每以為君子立行應依禮而動雖隱

顯殊迹未有不傍禮教者也若乃放達不羈以肆  
縱為貴者非但動違禮法亦道之所棄乃著通道  
崇檢論世咸稱之蘇峻之亂避地東陽山太尉郗  
鑒檄為兗州治中征西將軍庾亮請為儒林將軍  
皆不就邑里宗其道有事必諮而後行東陽太  
守阮裕深相欽重養志二十餘年永和九年卒  
朱汎明一統志沛國朱雲之後永興中為臨海太守  
有政聲秩滿居蒲墟村遂為義烏人萬歷義烏  
縣志字孝祥曾孫幼  
揚州刺史治揚有功

## 南北朝

匡昕南史本傳字令先廬陵人有至性隱金華山服  
食不與俗人交母病亡已經日昕奔還號叫母

即蘇人以為  
孝感所致

劉峻

梁書本傳字孝標平原人好學家貧讀書終夜不寐清河崔慰祖謂之書淫天監初召入西省

典校祕書安成王秀引為戶曹叅軍給其書籍使鈔錄事類名曰類苑未及成以疾去因遊東陽紫

陽巖築室居焉為山棲志其文甚

美普通二年卒諡曰玄靖先生

顧野王

陳書本傳字希馮吳郡吳人幼好學七歲讀五經知大旨九歲能屬文長而徧觀經史天

文地理無所不通梁大同四年除太學博士侯景之亂丁父憂歸乃召募鄉黨數百人隨義軍援京

師體素清羸又居喪過毀殆不勝衣乃杖戈披甲

陳君臣之義逆順之理抗辭作色見者莫不壯之

逃會稽尋往東陽與劉福義合軍據城拒賊侯景

平太尉王僧辯深嘉之陳天嘉元年補撰史學士

太建六年除太子率更令時濟陽江總吳國陸瓊

北地傅縡吳興姚察並以才學顯著論者推重焉

唐

韋莊

婺書字端已京兆杜陵人見素之孫乾寧進士授校書郎避亂客婺有和陸諫議懷山居詩曰

望闕路仍遠子牟魂欲飛道開燒藥鼎僧寄卧雲衣故國饒芳草他山挂夕暉東陽雖勝地王粲奈

思歸

五代

蔣勛

十國春秋晉吳郡太守樞之後唐末避地婺州之東陽仕至金紫光祿大夫檢校司空兼御史

大夫遂

家焉

宋



王彥超

兩浙名賢錄臨清人徙居義烏之鳳林少事後唐歷晉至周顯德中累官永興軍節度移

鎮鳳翔宋初與太祖有舊遷為右金吾衛上將軍判街仗事初彥超自節鎮來朝與郭從義等侍宴太祖從容謂曰卿等皆國家舊臣久臨劇鎮非朕所以優賢之意彥超知旨即日解官時議許之

周常

宋史本傳字仲修建州人中進士第徽宗召為國子祭酒進中書舍人禮部侍郎蔡京用事不

能容以寶文閣待制知湖州尋奪職居婺州

楊時

傳詳名宦舊浙江通志紹興間寓金華潘黥成從之遊時王師愈方幼穎悟黥成攜見龜山出

論語傳相示師愈拜而受之

呂朶中

嘉靖金華縣志夷簡五世孫父好問尚書右丞朶中隨高宗南渡始居婺州子祖謙生於

桂林甥館其學本之家

庭得中原文獻之傳

**蘇遲**

金華賢達傳字伯克眉山人轍長子建炎二年以右朝請大夫直祕閣知婺州奏減稅額父老

為立生祠因家焉卒葬蘭溪靈洞後贈少傅娶之蘇氏始此子簡策

**鄭淮**

浦陽人物記白麟十九世孫其先居滎陽遷浦陽遂為浦陽感德人孫綺字宗文事父母至孝

厥後子孫同居

六世歷二百年

**傅雱**

浦陽人物記世居汴父大理評事瑄攜雱遷浦陽之感德雱多膽畧與李綱宗澤遊建炎元年

遣雱為祈請使高宗命李綱草二帝表付雱以行獻二帝衣各一襲雱與王倫俱畱金軍久之全節

以歸官至

工部侍郎

賈廷佐

兩浙名賢錄字子野真定人剛毅有大節宣和二年入太學隨父淵扈蹕南渡遂家東陽

登紹興二年進士授桐廬簿時金遣張通古偕王倫南來以詔諭江南為名廷佐一再上書累千餘言劇論讐恥之不可忘名分之不可貶和約之不可信請誅王倫決意用兵以圖恢復辭旨剴切累官大理司直出知處州致仕所著有善願集愚齋雜著若干卷

柳森

浦陽人物記河東人建炎中父鑄始從趙林自解遷杭森又自杭遷浦陽烏蜀山森子金擢咸淳三年進士為高郵令宋季城竇山民倡亂火金所居官欲盡斬之金惻然曰此豈其本心哉第為飢寒所驅爾乃白戮其魁餘悉縱不問眾感金造室廬還之生子貫

鞏庭芝

正德武義縣志字德秀東平須城人建炎間遷居武義人號山堂先生登紹興八年進士

第授建德主簿改秩知諸暨縣主管崇道觀陞太平錄事叅軍嘗受業於劉元城先生之門以道學

倡武義武義人士知尚理義之學自

庭芝始隆興二年卒贈大中大夫

趙相

名勝志洛陽人紹興間帥廬州死於鄞瓊之難子孫居婺州梵嚴寺殯焉

王渙之

明一統志大名父良儒紹興間知永康因家焉又徙武義渙之幼穎悟能文嘗作王氏

敘傳

馬任仲

明一統志建陽人從朱文公游紹興間中進士乙科寓居東陽歷官州縣以廉能見稱所

著有奏議雜

著得齋集

陸九齡

宋史本傳字子壽居撫州之金谿幼穎悟端重稍長補郡學弟子員時秦檜當國無道程

氏學者九齡獨尊其說登乾道五年進士第調桂陽軍教授改興國軍地濱大江俗儉嗇而鮮知學九齡不以職閑自佚益嚴規矩肅衣冠如臨大衆勸綏引翼士類興起調全州教授未上得疾卒九齡治家有法閨門之內儼在朝廷而忠敬樂易鄉人化之皆遜弟焉與弟九淵相為師友學者號二陸舊浙江通志乾道九年八月來婺與東萊相會同觀實錄淳熙六年復來東萊東考亭曰子壽前經過畱此二十餘日幡然以鷺湖前見為非甚欲著實看書講論心平氣下相識中甚難得也

### 陸九淵

宋史本傳字子靜乾道八年進士除將作監丞主管台州崇道觀每開席講戶外屢滿者老扶杖觀聽自號象山翁學者稱象山先生嘗與朱熹會鷺湖論辨所學多不合及熹守南康九淵訪之熹與至白鹿洞九淵為講君子小人喻義利一章聽者至有泣下熹以為切中學者隱微深錮

之病門人楊簡袁燮舒璘沈煥能傳其學云舊浙  
江通志淳熙元年來婺東萊自三衢歸相會時東  
萊與汪應辰書云陸君相聚五六  
日淳篤敬直流輩中少見其比

### 楊與立

正德蘭谿縣志字子權浦城人受業朱子之  
門嘗知處州遂昌縣因家於蘭溪以道淑人

學者多宗之稱為船山先生  
所著有朱子語畧十二卷

### 王德良

宋濂王秉彝傳字秉彝和州人鉤經索史智  
識過人間徜徉山水見巖姿川容網緼獻狀

情思炯炯然曰精聚神會吾殆與之無間豈古人  
所謂烟霞痼疾也耶勸之仕笑不答僑居金華建  
藥區市中蓄善藥以賑人急甚窶者不受其直由  
是樂善之稱聞四方秉彝曰是善名我遂以榜其  
堂

明

李

騁獻徵錄字宗表其先封邱人有諱初者從宋南

遷遂居錢塘其占籍金華之永康則自騁始騁少從鄉里師口占詩能作驚人語往往從永嘉鄭公僖學浙西憲副以茂才異等薦常山教諭包山書院山長皆弗就翱翔東陽永嘉二邑間陳世恭初館於家士多敬愛之著書賦詩若將終老洪武初蒐訪遺逸有司首以騁貢補國子助教日從其長設為教條以責成效未及考竟以疾免踰年還永康天性孝友奉母備至容於外月不見母必歸省有異味必以遺母在浙東時兄病疫得書倉皇戒行李至則兄病已危瞪目視騁指取計簿并篋笥鐫器藏之騁不避疫染百端營救而愈悉還其兄前所付博覽強記為文蒼勁詩緣情指事不煩雕刻有草閣集

性天然

七修類稿永樂初有自稱性天然者寓金華東陽縣東山儀容俊偉識趣超卓惟披麻戴

笠不服常服盤桓於山南村落間與之游飲者每得其詩畫將死囑主人曰斂吾懸於林木足矣主人卒葬之其邑里姓名終莫知之嘗見其歌及稱王姓者曰宗兄是必王其姓而建文朝之人也或

又號玉

華山樵

國朝

沈壽民

金華府志字眉生宣城人為諸生有聲崇禎九年行保舉法巡撫張國維以壽民應詔入

都抗疏論本兵楊嗣昌及總督熊文燦不報由是名動天下未幾移疾歸講學姑山攜家寓金華蘭谿武義諸邑山中隱居著述窮餓終身門人私謚曰貞文先生有閑道錄姑山文集諸書行世



衢州府

晉

殷浩

晉書本傳字深源陳郡長平人識度清遠弱冠有美名尤善立言與叔父融俱好老易融與浩

口談則辭屈由是為風流談論者所宗三府辟皆不就於時擬之管葛王濛謝尚知浩有確然之志相謂曰深源不起當如蒼生何建元初衛將軍褚裒薦浩徵為建武將軍揚州刺史時桓溫既滅蜀威勢轉振朝廷憚之以浩有盛名朝野推服故引為心膂以抗溫為是與溫頗相疑貳遭父憂去職服闋復為建武將軍揚州刺史遂叅綜朝權以中原為已任上疏北征許洛將發隆馬時咸惡之既而桓溫聞其敗上疏罪浩竟坐廢為庶人徙於東陽之信安縣浩少與溫齊名而每心競溫嘗問浩

君何如我浩曰我與君周旋久寧作我也浩雖被黜放口無怨言但終日書空作咄咄怪事四字而已永和十二年卒咸安初故吏顧悅之上疏訟浩追復本官元豐九域志衢州信安軍有殷浩宅土

人號曰殷牆

陳弘

衢州府志字伯猷閩中人有勇畧喜讀書初依晉益州刺史王濬擢叅謀太康元年濬克西陵荆門彝道諸州自武昌抵建業所向克捷弘實左右之時鮮卑餘孽趙峻猖獗甚弘率輕騎襲擒之黠黨皆懾伏上嘉其績特授崢嶸鎮總管封信安侯食邑三百戶遂家於信安年九十薨洪武初以護國著靈異加贈寧邦感應侯更新祠宇以時享之

唐

周美

正德江山縣志字元善淮右陸安里人為衢州刺史愛須江土沃民淳山水佳勝乃卜居江山

家焉析子孫為五坦曰新

坦同坦學坦麗坦平坦

汪處崇

龍游縣志徽州人越國公華之孫尉龍游遂家於團石世稱汪家灘有汪侯墓

五代

吳祐字

常山縣志字齡交饒州人進士清泰二年守衢州解印綬居常山之紹德鄉晉天福五年

復起守汀州周廣順三年任銀青光祿大夫檢校工部尚書兼御史中丞八世孫嘉進為江山教諭

遷居

松峰

詹從効

常山縣志字堯臣以字行南陽人為錢王鏐賓佐方鏐起偏將攻王郢敗黃巢削劉漢宏

兄弟之黨遂劉浩執薛朗皆堯臣功居多鏐建功  
臣堂立碑紀功堯臣與焉梁太祖即位封鏐吳越  
王堯臣亦進節度副使閩中亂遣堯臣領兵至常  
山草萍地鎮守後乞骸定居八都彤舊莊卒追封  
鎮東軍節度使開府儀同三司  
檢校太師鄂國公諡曰恭

宋

王仁裕

衢州府志字德輦汴人晉翰林學士入周為  
左僕射加太子太保宋興棄官來信安隱居

穆陵號穆陵居士  
著西江集行世

吾渭

衢州府志字清源姑蘇人多謀善斷曹彬下江  
南辟為參謀南唐既平進官都督授三衢守遂

家焉子淵居西  
安滿居開化

**樊清**

常山縣志字從源南陽人元祐八年以薦授中書舍人尋拜翰林學士尚書右丞屢抗疏以裨

時政南渡後居常山之壘石子盤

孫游俱登第曾孫充駙馬都尉

**趙鼎**

傳詳名宦兩浙名賢錄聞喜人高宗即位除權戶部員外郎遂卜居衢州

**趙令矜**

弘治衢州府志字表之太祖裔孫大觀三年賜上舍出身高宗中興除都官郎因上章畱

張浚罷居衢州未幾復官襲封安定郡王尋奉祠歸孝宗親瀧宸翰以寵其行號超然居士

**胡正**

衢州府志歙縣人仕至兵部尚書靖康中避亂來常邑卒葬郭山所居今名胡村

**孔端友**

兩浙名賢錄曲阜裔建炎初襲封扈蹕南渡因家於衢後于玠嗣紹興六年詔權以衢州

學為家廟賜田五頃以奉烝嘗玠從弟傳字世文御史中丞道輔之後與玠同至衢後守臨川時建

昌軍亦累招降皆不受必欲見傳為信傳挺然往  
諭叛兵以平凡南渡後廟學皆傳所請所著有續

白氏六帖續尹植文樞紀要東家雜

紀杉溪集及道輔擊蛇笏藏於家

**魏 砥**

宋史本傳字邦達和州歷陽人唐丞相知古後  
宣和二年上舍及第常山縣志建炎元年知常

山縣四年改衢州管內撫幹辦公事尋被召極言  
時政秦檜用事士大夫少失其意禍輒不測砥終  
不少貶奉祠凡四任寓常山僧舍蕭然一室自奉  
雖薄而氣體甚充也紹興二十一年丁母憂卒於  
喪次子三欽承欽緒弼俱登第今子孫散居常  
山及西安凡五族惟開化杜川文物尤世其家

**馬 伸**

兩浙名賢錄東平人政和中進士歷官左司諫  
有直聲隨高宗南渡寓家龍邱抗疏劾黃潛善

汪伯彥用奸誤國責監濮州酒稅死道中後  
胡安國訟其冤請官其子孫以旌直臣不報

徐大興

弘治衢州府志洛陽人父幸隆仕河南節度使時金人長驅入淮郡縣望風奔潰幸隆率

河陽兵拒死朝廷旌其忠大興守衢廉謹節概有幸隆遺風尋奉父遺骸葬於常山之護國寺山遂

解政家於常立祠於寺子孫世祀焉

曾楸

弘治衢州府志字叔夏其先贛人元符進士宣和七年知興化府金人陷燕山詔帥守各募敢

死士入援楸率先諸郡以顯謨閣學士致仕楸祖平嘗為衢之判官因家焉有內外制文集東宮日記弟開字天游登進士第權直學士院出知婺州羅汝楫謂開嘗阻和議遂落職寓衢十三年端居簡出類山林枯槁之士有內外制藏於家

周大憲

衢州府志字用章敦頤裔道州人宋南渡來衢見常山八都形舊山奇秀遂家焉子旦五

經博士遠進士子孫分居東門大街餘遷江山濟寧永豐

徐雲翔

常山縣志字允升汴人南渡遷臨安雲翔從呂祖謙周必大游擢進士第授衢州路西安

今悅衢風土  
遂遷居常山

蔣羽

江山縣志字汝翔家世居吳高宗朝舉賢良辭不赴繼舉文學亦辭適三衢聞徐逸平講學南

塘里就訪酬和因見須江山水清遂占籍文明坊

汪應辰

傳詳名宦宋史本傳請祠歸寓居常山之永年院

趙子晝

宋史本傳字叔問燕王五世孫少警敏強記工書翰宣和初充詳定九域圖志編修官詔

為刑部員外郎以憂去建炎四年遷吏部員外郎尚書左司員外郎試太常少卿集太常因革禮八



十篇為二十七卷上言復春分祀高禘禮除權禮  
部侍郎遷徽猷閣直學士知秀州既而奉祠以歸

寓於衢

范冲

兩浙名賢錄字元長祖禹長子建炎四年守衢  
因請祠與趙丞相鼎同居高宗以神哲兩朝錄

多失實召冲為宗正少卿兼直史館冲遂盡削蔡  
京蔡卞所增宣仁太后誣謗事又極言王安石變  
法度之非蔡京誤國之罪上嘉納之書成遷起居  
郎兼侍讀改翰林侍讀學士未幾坐與趙鼎有連  
奪職歸

馬希言

西安縣志濮州鄆城人唐馬周後高祖給事  
應圖與從父諫議仲皆以節義著南渡後希

言為少卿  
寓龍邱

華仁祖

衢州府志延陵人父為黃門侍郎以祖和議忤秦檜落職知饒州卒於官仁祖扶柩至衢

隱居城西黃茶後

子孫遷居常山

任古

弘治衢州府志字信儒世居濟寧建炎初登第紹興間宰甌寧以母憂歸過衢因卜葬焉廬墓

終喪除監察御史有拙齋遺稿三卷

何若

弘治衢州府志字任叟建康人弱冠登第擢御史除簽書樞密院事以疾奉祠家於衢所著有

尚書春秋講義漢唐史評風山集

邵知柔

福建通志字望政和人進士兩浙名賢錄紹興間歷官國子祭酒以直龍圖閣奉祠寓

西安城東之菱塘舍側有古木輪囷離奇卧塘上知柔因繫小舟扁曰野航日夕吟咏其中題其詩

曰野  
航集

韓公裔

弘治衢州府志字子辰家本開封為康邸舍人積功遷岳陽軍節度使先是史館修日歷

凡藩府舊事與霸府建置本末人無知者公裔省憶成書秦檜遣史官楊愿質之所記皆實檜欲賞公裔會除保康軍承使檜疑其舍己而自求於上使言者論公裔與愿往來坐廢後奉祠家於衢卒贈太尉諡恭榮

洪邁誌其墓

張翬

弘治衢州府志字仲思南京人登進士第建炎初守昭武金遣使約翬降附翬怒亟斬之先是

翬子申陷北和議成申欲取其父時翬居衢朝廷下衢趣遣行兇與秦檜書謂以子召父不孝背德犯順不忠誓不與逆子俱生以故鄉郡不為給祿者十五年檜死始奉祠卒韓元吉誌其墓

譚惟寅

尚友錄字子欽高要人紹興中登進士第官至浙西憲府讀書一覽終身不忘嘗寓衢州

祥符寺借燭閱碑不得遂以手摸之既歸畢錄黎明對本不遺一字

李處全

江山縣志字粹伯洛陽人能文終侍御史弟處勵守衢州時處全寓須江仙居僧舍擇林

壑之勝與弟同家焉

趙希綰

萬厯龍游縣志汴人工部郎中為和州防禦使居龍游四子與汶與潞與瀚與澧皆相繼

登上第御賜其居曰傳芳堂

徐士安

衢州府志字公輔長沙人乾道進士令江山有政聲晚致政愛江俗朴茂遂占籍邑之南

門

**徐國鎮**

常山縣志字定夫靈山人希賢六世孫封千戶侯率兵捍寇雄傑軼倫輩理宗未棄職攜

家居常山之十都馬路隴疾革命以  
戈甲從瘞表厥志子孫徙居彤弓山

**元**

**左宗海**

衢州府志字百會東萊人至正間孝廉啟諭西安作人造士諸門下依依不忍舍構廬設

帳遂居於衢子孫十數世皆敦詩說禮好施明  
季有都御史忠義節烈名懋第者即其族也

**潘必卿**

西安縣志字國相號南江豫章武寧人至正間以明經任衢州路教授嘗師事吳澄得程

朱要旨悉以所傳牖迪後學衢士婉畱久寓以終  
教育性至孝迎父文江就養以衢俗淳厚遂治第

孝義里因  
占籍云

岳弘

弘治衢州府志湯陰人武穆王九世孫元未任江西鉛山州同知避亂僑居開化雲臺鄉之白沙弘治十年叅政周木檄縣求其後十三世孫奉祠焉仍給居室田土以優養之

明

徐恢

衢州府志字伯弘鄱陽人元未登進士授永新令時陳友諒攻南昌守將朱文正湯和嬰城固

守明太祖引兵來援強弱不敵人懷觀望恢知友諒必敗明祖當興會友諒徵糧郡縣廬陵守遣恢運納恢竟以糧歸吳太祖大喜即軍中授都御史鄱陽之捷恢與有力焉累官戶部尚書勅賜開國元勳初僑寓杭城六卿坊後遷常山左坑居焉

徐演

西安縣志字仲永福建人洪武鄉薦父宏明經舉任衢州教授道經浦城出江山鳳林鄉樂風

俗淳雅命演占籍焉演歷官助教翰林試楮先生  
傳進呈第一名特拜右春坊以疾告歸自江山遷

西安繼芳紹

芳其裔也

**袁敬所**

明詩綜敬所不知其名靖難後流寓常山之  
松嶺酒酣書五柳圖詩有江右布商見之曰

此吾鄉某編修何為在此敬所趨掩其口不顧而  
去常山縣志敬所五柳圖詩云藜杖芒屨白布裘

山中甲子自春秋呼兒檢點

門前柳莫遣花飛過石頭

**班琴**

正德江山縣志京兆人號南軒福建布政  
使占籍江山子平字季清官至河南參政

**鄒璘**

江山縣志號復齋成都人崇禎庚辰進士任古  
田知縣調補餘杭有政聲擢刑部郎中遇闖亂

流寓江山南峰寺尋不食死子澄入籍登

國朝康熙壬子鄉薦

國朝

王虎

衢州府志字在山山東文登縣人隨其父壽明至衢標驍勇善騎射康熙十三年討耿逆屢著

戰功制府李之芳拔授衢左營千總委運軍糧又調集鄉勇練卒伍直逼賊壘晝夜攻守甚力及耿逆蕩平制府上其功候陞補而卒贈守備虎處衢五十餘年雖起自戎行能以禮法範家戶庭肅然即比隣未嘗見其譁聲迕色

嚴州府

唐

喻鳧

兩浙名賢錄南昌人開成中登進士第以詩名於時徙家睦州嘗與方干賦詩往還仕至烏程



尉有詩一  
卷行於世

### 五代

章仁肇

兩浙名賢錄浦城人仕後周為檢校尚書工部侍郎兼耀武將軍有功於時廣順中徙居

桐廬安定鄉之窠石居仁行義鄉人敬服之宋季有名木者其裔孫也擅詩名號小客星有梅觀集

今居梧桐村者  
皆其流裔也

### 宋

余稠

嚴州府志河間人仕吳越太傅建隆八年錢王俶歸宋稠輔以行太祖畱稠為睦州刺史因家

於郡之分陽數傳至誠一宋南渡為國子丞有異績著南疇集行世尋以元兵至臨安避居郡城遂

世其家

**商瑗**

兩浙名賢錄其先汴人流寓西夏為都知兵馬使嘉祐六年因奉使歸宋奏獻密事上嘉其忠

賜地於浙之淳安以居即今遼源之芝山也子孫因家焉以蔭補官者三世

**黃裳**

福建通志字冕仲南平人元豐五年對策第一政和間為端明殿學士禮部侍郎遷尚書嚴陵

志嘗游桐廬讀書於浮橋之禪定院又寓居閬仙洞者十餘載自號紫元翁舊時禪定院有紫元祠堂閬仙洞有紫元卷皆祠裳也

**江端友**

兩浙名賢錄字子我陳畱人博學能詩與呂居仁相倡和以元祐黨家居不仕亦不娶隱

居封邱門外靖康初丞相吳敏薦為承務郎諸王宮教授上書辯宣仁誣謗被黜渡江寓居桐廬之

蘆茨源自號七里先生後為太常少  
卿所著有七里先生自然菴集七卷

謹按江端友舊浙江

通志作汪端友誤

### 呂本中

宋史本傳字居仁宰相公著之曾孫好問之  
子幼而敏悟公著奇愛之少長從楊時游醉

尹焞遊紹興六年特賜進士出身擢起居舍人兼  
權中書舍人七月上幸建康本中奏當先為恢復  
事業求人才卹民隱講明法度詳審刑政開直言  
之路使人人得以盡情然後練兵謀以增師上流  
固守淮甸使江南先有不可動之勢又奏江左形  
勢如九江鄂渚荆南諸路當宿重兵臨以重臣八  
年兼權直學士院本中與秦檜同為郎檜既相私  
有引用本中封還除目檜風御史蕭振劾罷之提  
舉太平觀卒學者稱為東萊先生嚴陵志本中河  
南人寓居桐廬之蘆茨源詩學黃山谷而主於自

然號彈丸法與江子我多唱和嘗作西江傳衣詩  
派圖列陳無已而下二十五人為法嗣謂皆出於  
山谷云卒諡文清所著有詩友淵  
源錄春秋解童蒙訓等書行於世

### 陳垣

兩浙名賢錄字伯和陽翟人博學工詩南渡寓  
居桐廬與滕岑相唱和岑盛稱之以為力追作  
者嘗次岑韻山居詩云解組滄溟畔攜家紫翠間  
地臨雙港勝天與兩年閑茅屋靜聞雨竹籬疎見  
山所慚隣舍老句險不容攀雙港者一名  
橫港即桐溪也以紹興進士終黟縣令

### 謝翱

宋濂謝翱傳字臯羽福之長溪人父鑰通春秋  
翱世其學試進士不中侗儻有大志曾丞相文  
天祥開府延平長揖軍門諸事參軍已後別去及  
天祥被執以死翱悲不能禁隻影行浙水東巖有  
子陵釣臺翱設天祥主再拜伏酌號慟者三乃以  
竹如意擊石作楚歌招之歌闋竹石俱碎性嗜佳

山水雁山鼎湖蛟門候濤沃洲天姥四明金華洞  
天搜奇抉祕即著游錄游倦輒憩浦陽江源及睦  
之白雲村尋隱者方鳳吳思齊晝夜吟詩不自休  
至元甲午去家武林西湖上明年肺疾作瀕死屬  
其妻曰吾去鄉千里交游惟方韶卿吳子善最親  
慎收吾文及吾骨授之韶卿即鳳子善即思齊已  
而鳳等至瘞子陵臺南以文稿殉伐石表之曰輿  
謝翱墓無子其徒吳貴祠之月泉書院所著手抄  
詩八卷雜文二十卷唐補傳一卷睦州山水人物  
古蹟記一卷浦陽先民傳一卷天地問集五卷東  
坡夜雨句圖一卷宋鏡歌鼓吹曲一卷南史補帝  
紀贊一卷楚詞芳草圖補一卷浙東西遊錄九卷

元

方回

元詩選傳字萬里別號虛谷歙縣人宋景定壬戌別省登第元時為建德路總管尋罷徜徉杭

睦間睨傲自高不修邊幅其自序桐江集云予自  
桐江休官閒居萬事廢忘獨於讀書作詩未之或  
輒時年已六十餘矣嘗選唐宋以來近體詩評  
論之曰瀛奎律髓於情景虛實間三致意焉

明

王宗顯

傳詳名宦江南通志和州  
人元季避亂僑居嚴州

達兼善

遂安縣志西域人元蘭臺御史洪武初欲復  
其官力辭就教因家於遂今治東南達家井

其故

居也

許全

萬歷桐廬縣志丹徒人永樂間任縣尉操守不  
苟秩滿愛嚴陵風景因家焉子孫業儒不絕

楊漢

桐廬縣志雲南人由舉人正德十一年自金華  
改知桐廬忠誠篤厚不務時譽不妄興作及休

致以親老家遠遂寓桐入籍初至金華時  
過桐江誤落其冠至是僑寓始知先兆云

### 温州府

### 晉

### 郭璞

温州府志字景純弘農人嘗客甌為阡郡城有  
白鹿銜花之瑞故城名白鹿嘗謂九山象斗華  
蓋松臺郭公海壇四山為斗魁積穀巽吉仁王三  
山為斗杓黃土靈官二山為輔弼且云此去千年

地氣  
始旺

### 唐

### 孟浩然

唐書本傳浩然襄陽人温州府志常過東甌  
訪友張子容遊孤嶼有衆山遙對酒孤嶼共

題詩之句又有樂成  
懷歸及別張子容詩

謹按浩然集中又有宿天台桐柏觀宿桐廬江建  
德江及渡浙江耶溪泛舟諸作知其久客浙中遊  
歷殆徧不獨流連

永嘉山水已也

崔道融

文獻通考自稱東甌散人著東浮集九卷乾  
寧乙卯永嘉山齋編成蓋避地於此者温州  
府志道融  
荆南人

五代

吳畦

瑞安縣志字禎祥登進士第歷官諫議大夫以  
諫舉兵討河東忤上意左遷潤州刺史時錢鏐  
與董昌爭郡欲劫以兵不屈夜率二弟侍父母避  
地安固庫村遂家焉後葬其地子孫繁衍散處甌



恬惟安  
固為盛

宋

徐爽

秦順縣志閩甯人祥符癸丑廷試賦鑄鼎象物擢第一自甌寧入安固居睦源今為木棉村

呂夷簡

宋史本傳字坦夫壽州人進士及第補絳州軍事推官遷尚書祠部員外郎改起居舍人

知制誥再遷刑部郎中權知開封府治嚴辦有聲  
仁宗即位以給事中叅知政事上疏陳八事曰正  
朝綱塞邪徑禁貨賂辨佞壬絕女謁疎近習罷力  
役節冗費語甚切至進位司空以太尉致仕溫州  
府志夷簡常慕東南山水  
佳勝寓雁山有淨明菴詩

馮成

兩浙名賢錄字熙績滑州人魯國公守信之孫  
建炎間扈駕至溫州遂居永嘉德政鄉岳飛數

奇之羅致幕中屢與兀术戰捷收復州縣每念魯公以必死報國高宗書嘉忠二字賜之遂以嘉忠名堂飛既寃死成遂滅跡人間以琴書自娛號湖山居士

**洪模**

萬厯温州府志丹陽人父擬知温州有治劇才模歷官驃騎上將軍浙東宣慰使寓家於溫建

總政堂  
夢草堂

**徐定**

兩浙名賢錄字德操泉之晉江人釋褐調處州教授娶永嘉鮑氏因家焉知邵武縣通判太平

州擢守湖州于璣字致中工詩世稱四靈璣其一也終長泰令孫似孫仕至浙東帥叅宋末劉萬奴欲屠城似孫力爭獲免鄉人德之

**元**

**黃公望**

輟耕錄字子久自號大癡又號一峯本姓陸世居常熟後寓永嘉黃氏博學強記畫山水

宗董巨自成一家所作寫山水訣甚有理致人多效之卒未有得其彷彿者

**馬德**

樂清縣志原名驥字萬甫任縣簿時方國珍亂海上德以生民為慮輒戎服戒軍旅為固守計

樂民咸藉以安後以衰老謝事家於樂清葬丹霞山

**李光**

萬厯温州府志字彥明貴溪人至正末官樂清量田畝均事役民賴蘇息光有文武才嘗教諭石門及溫郡又巡莆田掾樞府所至有績後以寇亂道梗即樂清家焉嘉靖間裔孫顯官至都御史

**明**

**鄭善夫**

國寶新編字繼之福州人仕至南京驗封郎中發情聲詩古色精言高映霞表好遊名山

嘗寓雁蕩峻陟冥搜都志

內顧與衢州方豪同好

文徵明

名山藏初名璧以字行更字徵仲長洲人父林為溫州太守文章政事有名於時徵明少

從遊林卒官溫人斂數百金為賻徵明固謝不受溫吏士謂文氏父子皆能廉修故卻金亭以林配

前守何文淵徵明書畫名重一時以貢至京尚書李充嗣大學士劉忠交薦授翰林院待詔致仕歸

萬均佐

樂清縣志江西人官監察御史與樂清范霖同官相善因過訪見山川秀麗遂家焉翔室

於縣東堡其墓在西祭山

顧錫疇

江南通志字九疇崑山人萬歷己未進士入翰林典福建試會政府以請託不從傳成其

罪削籍歸崇禎初召用歷陞至禮部尚書會父卒錫疇奔喪赴閩兵亂遇害葬溫州樂清縣志明末

避地至甌從台州來雁蕩  
低徊不去有咏懷畱別詩

### 處州府

唐

李陽冰

傳詳名宦畿輔通志為縉  
雲令秩滿退居吏隱山

宋

周啟明

宋史本傳字昭回金陵人占籍處州四舉進  
士皆第一景德中舉賢良方正科既召會東

封泰山言者謂此科本因災異求直言非太平事  
遂報罷歸教弟子百餘人不復有仕進意仁宗即  
位除試助教遷祕書郎改太常丞啟明篤學藏書  
數千卷多手自傳寫而能口誦之有古律詩賦牋

啟雜文千

六百餘篇

趙希懌

宋史本傳字伯和燕王八世孫崇禎處州府志寓居青田登淳熙進士守信州諸邑積逋

數萬悉蠲之郡計亦無缺提舉江西歲饑賑濟給憑令民就糴歷官至端明殿學士昭信軍節度使開府儀同三司贈少保追封成國公諡正惠生平茹蔬施藥凡可以濟人利物靡不為子與憲與哲與懃皆貴顯與愿寧宗召入宮賜名曦封榮王開禧三年立為太子改名詢寓居縣百步新市巷及召入迎以寶幢導出

此街因名寶幢街

洪煥

縉雲縣志饒州鄱陽人适之子淳熙間任處州僉判因家於縉雲百岡山中誅茅縛屋儉然自

放工詩文淹雅詳核克繼祖父之風

鄒應龍

崇禎處州府志福建邵武人慶元丙辰廷試第一累官至叅知政事先試禮部日麗水葉

挺充考試官應龍實挺取中又娶挺之女  
因家麗水人名其所居之里曰德星里

元

李德大

縉雲縣志唐令李陽冰之裔至正間投縉雲美化書院山長睹窪樽手澤遂結廬山麓

扶長卿

縉雲縣志揚州人元末仕縉雲典史有政聲秩滿遂居邑之廻石

明

朱成遠

括蒼彙紀宜春人洪武間知縉雲操持幹濟夙出人表善詞翰接禮賢士以詢民瘼罷官

後僑寓邑城好植花木人以潘安仁擬之

周顥

慶元縣志字仲昭山西澤州人永樂十八年由太學授慶元縣丞歷九載清勤慈惠秩滿不樂

仕進僑居邑城葬竹溪之原其子公榮因家焉

阮廷貴

慶元縣志四川永川人正統間由太學來丞慶元多惠政士民悅之遂家焉

雪溪漁父

青田縣志不知何許人獨擔囊至青田就村中沽酒囊出玉杯自飲問姓名不答但

云雪溪漁父邑人陳中川邀至齋一飲數斗或終日不食見詩文輒為改竄又題所懸畫竹詞翰並妙後不知所往



浙江通志卷一百九十五

欽定四庫全書

史部

浙江通志卷一百九十六

詳校官給事中臣戴璐

檢討臣德生覆勘

總校官編修臣倉聖脉

校對官中書臣李荃

謄錄舉人臣孫炯

欽定四庫全書

浙江通志卷一百九十六

方技

龍門以龜筮名篇蔚宗為方術列傳蓋體極藝能  
可以弘補時事亦史乘所不遺也在昔五絕八技  
皆屬浙產殊才異術馳譽寰區繼此專門名家後  
先疊蹟多能雖曰鄙事而小道亦必有可觀志方

技

杭州府

晉

徐熙

南史張融傳熙濮陽太守好黃老隱秦望山有道士過求飲留一瓠齋與之曰君子孫宜以道

術救世當得二千石熙開之乃扁鵲鏡經一卷因  
精心學之遂名振海內生子秋夫彌工其術仕至  
射陽令常夜有鬼呻聲甚悽愴秋夫問何須荅言  
姓某家在東陽患腰痛死雖為鬼痛猶難忍請療  
之秋夫曰云何厝法鬼請為芻人按孔穴針之秋  
夫如言為灸四處又針肩井三處設祭埋之明日  
見一人謝恩忽然不見當世服其通靈秋夫生道  
度叔嚮皆能精其業道度生文伯叔嚮生嗣伯亦  
精其業

謹按南史敘熙於文伯傳內為道度之祖道度係  
宋文帝時人則其祖必非宋時人明矣故列熙於  
晉而以秋  
夫附焉

## 南北朝

### 徐道度

南史張融傳道度有脚疾不能行宋文帝令  
乘小輿入殿為諸皇子療疾無不驗位蘭陵

太守宋文帝云天下有五絕而皆出錢塘謂杜道  
鞠彈碁范悅詩褚欣遠摸書褚引圍棋徐道度療  
疾也

### 徐文伯

南史張融傳字德秀有學行倜儻不屈意於  
公卿不以醫自業為效與嗣伯相埒宋孝武

路太后病衆醫不識文伯診之曰此石博小腸耳  
乃為水劑消石湯病即愈除鄱陽王常侍遺以千

金旬日恩意隆重宋明帝宮人患腰痛牽心每至輒氣欲絕衆醫以為肉癥文伯曰此髮癥以油投之即吐得物如髮稍引之長三尺頭已成蛇能動挂門上適盡一髮而已病都差子雄亦傳家業尤

工診察位

奉朝請

徐嗣伯

南史張融傳字叔紹位正員郎諸府佐為臨川王映所重時直問將軍房伯玉服五石散

十餘劑無益更患冷夏日常複衣嗣伯為診之曰卿伏熱應須以水發之非冬月不可至十一月冰雪大盛令二人夾捉伯玉解衣坐石取冷水從頭澆之盡二十斛伯玉口噤氣絕家人啼哭請止嗣伯遣人執杖防問敢有諫者過之又盡水百斛伯玉始能動而見背上彭彭有氣俄而起坐曰熱不可忍乞冷飲嗣伯以水與之一飲一升病都差自爾恒發熱冬月猶單禪衫體更肥壯

徐子才

舊浙江通志雄之子幼僞發有機辨解天文圖讖之學善醫有人患脚跟腫痛諸醫不識

子才曰蛤精疾也由乘船入海垂脚水中所致為剖得蛤子二大如榆莢和士開以為兗州刺史

五代

羅塞翁

圖畫見聞志錢塘令隱之子善畫羊世罕有其蹟惟餘姚陸家曾收一卷精妙卓絕

喻皓

夢溪筆談營舍之法謂之木經皓所撰也錢氏據兩浙時於杭州梵天寺建一木塔方兩三級

帥登之患其塔動匠師云未瓦上輕故如此乃以瓦布之動如初密使其妻見皓之妻賂以金釵問

塔動之由皓笑曰此易耳但逐層布板訖便實釘之則不動矣匠師如其言塔遂定

謹按沈括筆談不詳皓為何地人攷十國春秋附皓吳越列傳後且其妻在杭似為杭人無疑也

胡某

十國春秋目醫胡某者世療內外障眼針法獨神武肅王末年患目疾召使治之醫曰目易治

耳然大王非常人殆天所以為大王患者若療之是違天也恐損王壽王曰吾起身行伍跨有方面富貴極矣但得兩眼見物為鬼不亦快乎既而應手豁然王喜賜物以萬計悉不受明年其言果驗

宋

程奕

東坡志林近世筆工不經師匠妄生新意擇毫雖精形製詭異不與人手相謀獨錢塘程奕所

製有三十年前意味使人作字不知有筆亦是一快予不久行當致數百枚而去北方無此筆也

孫景璠

書畫譜杭州水軍篆千字文為五十餘體太平興國年以獻太宗善之詔取去黥文隸御

書院宰相宋琪請授以官秩太宗曰爵祿非所惜也顧此人面痕尚在豈稱冠帶乎琪固言之乃授



國子書

學博士

張介

中山詩話以命術遊公卿間居錢塘西湖上常自京師南歸士大夫率為詩贈之

吳說

杭州府志字傅朋錢塘人師禮子善楷書虞伯生稱其深穩端潤非近世怒張筋脉之態九里

松字其所書也思陵嘗欲易之御書十數卒莫能及乃命以金飾之

郭昭乾

錢塘志鈔字汝端汾陽王喬孫祖遠授宋建隆二年節幹昭乾自祥符初由汴徙杭州多

隱德施子未常倦有異人乞齋郭膳之潛遺牡丹花三朶覆几上而去追詢之曰若累世隱德故來相報花上書婦人症十三方若子孫世世用之無窮如法試之無不奇驗遂為婦人醫郭氏之以醫名自昭乾始三傳至曾孫時義高祖建炎元年孟太后疾召醫時義以母馮氏應召依牡丹方治之

脫然愈封安國夫人賜田賜葬賜藥碾如鐵舟然又賜第海昌賜國姓至今稱趙郭里

謹按郭醫名顯自宋真宗至孝宗朝益著絕無授方壻郭之說舊志以為蕭氏誤矣郭世稱六八節幹乃意斷為明初人此人誤之誤也

**戴厚甫**

輟耕錄錢塘人精遁甲其母寢處樓上一夕忽見紅光貫室開幃視之乃一美女立榻前

自拔金釵遺母既而無所見母以語戴荅曰適祭遁神遂致此耳遁神見某必不久矣逾數月而卒

**嵇清**

兩浙名賢錄字仁伯世傳秘術善療金瘡骨損初父自汴扈蹕南渡時方戎馬蹂躪全活甚衆

清年未冠早諳先業宮中有患折肱者他醫莫措清為整治完好如昔禁掖詫曰小小嵇清能接骨耶壽皇躬親騎射時有悞損應期而瘳中外益重之

沈上宰

游宦紀聞胡伯量記度史君所藏坡仙涵星硯云硯外周以二髻匝蓋陰各有朱字紀歲

月及工人姓名外者已亥洋州造大方誌內者辛未杭州後洋沈上宰

馬和之

西湖遊覽志錢塘人紹興中登第官至工部侍郎善人物山水筆法飄逸悉粉藻自成

一家高孝兩朝最重其畫嘗書毛詩三百篇命和之篇畫一圖會成巨帙至今杭人嘗有存其散逸者其後有顧興裔者專師和之但設色不逮耳

耿聽聲

兩浙名賢錄亡其名錢塘人以聲音占故稱聽聲癸辛雜識家候潮門內兼能嗅衣物以

知吉凶貴賤德壽聞其名取宮人扇百柄雜以上及中宮所御令小黃門持扣之耿嗅至后扇云此聖人也然有陰氣至上扇乃呼萬歲上奇之

嚴防禦

養疴漫筆孝宗常患痢衆醫不效德壽憂之過宮偶見小藥肆遣中使詢之曰汝能治痢

否對曰專科遂宣至問得病之由語以食湖蟹多故診脉曰此冷痢也其法用新采藕節細研以熟

酒調服如其法杵細酒調數服即愈德壽大喜就以杵藥金杵曰賜之至今呼為金杵曰嚴防禦家

孫守榮

宋史方技傳富陽人幼病瞽遇異人授風角鳥占之術其法以音律推五數播五行以知

休咎復授以鐵笛守榮因號富春子吹笛市中人初不異也寶慶間游吳興聞譙樓鼓角聲驚曰日

夕且有變士人當有典郡者越兩月潘丙作亂王元春以告變功典郡由是名大顯甌江逸志周恒

未第時坐於觀橋市肆厲聲詬僕富春子聞其聲往揖之曰狀元何來周以給已不答後果擢進士

第一

李信

杭州府志汴人小兒醫也從宋高宗南渡遂家於杭之義和坊高宗詔信入侍因年耄賜安車

至禁中時

號李車兒

劉松年

畫法年紀錢塘人畫髓元銓居清波門淳熙畫院學士紹熙年待詔師張敦禮工畫人物

山水神氣精妙名過於師寧宗朝進耕織圖稱旨賜金帶院人中絕品也

陳沂

兩浙名賢錄其先沂人唐乾寧時有仕良者以醫名於時奉勅修聖惠方仕至尚藥局奉御子

孫遂世其業建炎中扈蹕而南遂為錢塘人萬厯錢塘縣志沂嘗起康王妃危疾賜御前羅扇使出入禁中仕至翰林金紫良醫子孫標木扇象之至今稱陳木扇而陳諫者尤精先業決男女生死多奇中所著有

蓋齋醫要

林椿

畫史會要錢塘人工畫花鳥翎毛瓜果師趙昌傳色輕淡深得造化之妙淳熙年畫院待詔賜

金

帶

韓慥

癸辛雜識紹興未賣卜於臨安之三橋多奇中庚辰春曾侍郎仲躬呂太史伯恭至其肆則先

一人在焉問其姓宗子也次第推命首言趙可至郡守却多貴子不達者亦卿郎次及曾則曰命甚佳有家世有文學有政事亦有官職只欠一事終身無科第次至呂問何幹至此呂曰赴試曰去年不合發解今安得省試曰赴詞科曰却是詞科人但不在今年今年詞科則有人矣後三年兩試皆得之且不失甲科復叩其所至沉吟久之曰名滿天下可惜無福已而其言皆驗

靳儼

杭州府志其先三晉人高宗南渡儼扈蹕至武林世為太醫數傳至從謙為御直翰林醫官賜

勅特晉三階出內府百子圖賜之命以所居巷為百子圖巷

### 馬遠

西湖遊覽志號欽山其先河中人也以畫名後居錢塘光寧朝待詔畫師李唐布景齊整工山水人物花鳥種種臻妙獨步畫院其樹多斜科偃蹇至今圓丁結法猶稱馬遠云兄逵亦善畫子麟能世家學然不逮父遠愛其子多於已畫上題麟字蓋欲其章也其時有蘇顯祖葉肖巖亦師馬遠蘇筆法稍弱俗呼為沒興馬遠葉小景酷似而大幅不如也

### 夏珪

格古要論字禹玉錢塘人寧宗待詔賜金帶山水布置皴法與馬遠同但其意尚蒼古而簡澹喜用秃筆樹葉間夾筆樓閣不用尺界畫信手畫成突兀奇怪氣韻尤高

### 王輝

西湖遊覽志錢塘人理度朝畫院祇候工人物山水釋道與李嵩同家間用左手描寫人稱為

左手王其時有白良玉何青年方椿年亦工釋道椿年又喜著色山水其後有鼎臣者亦師輝

**羅知悌**

戴良滄洲翁傳字子敬錢塘人世稱太無先生宋理宗朝寺人精於醫得金劉完素之真

傳而旁通張從正李杲二家之說成化杭州府志子敬以醫侍穆陵甚見寵厚宋未隱居少與人接丹溪朱彥修慕其術候門下三載始得見知悌念其誠盡以其術授之知悌能詞章善揮翰貧病無告子之藥無不愈者仍贍以調理之資

**邢氏**

萬厯杭州府志失名紹熙間以醫名於杭術業甚奇時韓侂胄知閤門事將出使俾之診脉曰

和平無可言所可憂者夫人耳知閤回輅日恐未必相見也韓妻本無疾怪其妄誕然私憂之洎出疆甫數月而其妻果報卒矣又朱勝非子婦偶小疾命視之邢曰小疾耳不藥亦愈然不宜孕孕必



死其家以為狂言後一歲朱婦得男其家方有抱孫之喜未彌月而婦疾作急遣召之堅不肯來曰

去歲已嘗言之勢無可

療之理越宿婦果卒

### 李立之

兩浙名賢錄臨安人以小兒醫擅名一時有嬰兒忽患疳求治立之令以衾裹兒乘高投

之地兒不覺大驚遂發聲能言問之曰此乳搖心也非藥石所能療

### 李嵩

西湖遊覽志錢塘人李從訓養子工人物山水道釋又長於界畫光寧理三朝待詔其徒有馬

永忠豐興祖顧師顏皆傳其法嵩老倦作多令永忠代筆其孫李章者亦善畫

### 朱懷瑾

畫史會要錢塘人寶祐間畫院待詔工山水人物樹木窠石作雪景用墨全師夏珪

### 夏巨源

夷堅志精於卜筮居臨安每來卜者一卦率五百錢紹熙三年洪禹之自贛倅受代造朝

其子价侍行既至點檢勅造文書遺其一遣僕還家訪尋終不能自釋乃自詣夏肆夏書紙上曰事在千里外繼書一食字一堯字合之則饒字也曰文書見在係一多口人收得而鴛鴦為看守無足憂也既而僕從饒州至持所遺返蓋向者打併行李時志在外小妾福安見之收寘鴛篋內既悟鴛鴦看守之語而福字有口田字又四口所謂多口人也

樓觀

畫髓元銓錢塘人工花鳥人物山水學馬遠筆法咸淳年畫院祇候

元

王繹

輟耕錄字思善自號癡絕生其先睦人居杭之新門篤志好學雅有才思年十二三已能丹青

亦解寫真李五峯俾作一圓光小像面部僅大如錢而宛然無毫髮異後得吳中顧周道緒言蓋造

精微是故於小像特妙非惟  
貌人之形似且得人之神氣

### 宋會之

嘉靖浙江通志杭州人元時名醫其治水蠱  
法以乾絲瓜一枚去皮剪碎入巴豆十四粒

同炒以巴豆黃為度去巴豆用絲瓜炒陳倉米如  
絲瓜之多少米黃色去絲瓜研之為末和清水為  
丸桐子大每服百丸皆愈其言曰巴豆逐水者也  
絲瓜象人脈絡也去而不用藉其氣以引之也米  
投胃氣也鮮于  
樞所記如此

### 李和

山居新語錢塘人精於碑刻凡博古之家或有  
贗本求一印識雖邀之酒食惠以錢物終毅然

却之其印文李  
和鑒定石刻印

### 韓文

清賞錄錢塘人善補硯雖百碎者但不失原屑  
補之若無損者亦能修古銅器居蒲橋夜宿一

石櫃中與人言無尊卑皆爾  
汝得錢即付酒家一舉而盡

陸華之

西湖遊覽志錢塘人以賣卜馳  
名且通文學縉紳多與之友

沈復東

貝瓊東齊志錢塘人幼穎悟好讀書既長受  
醫術於海昌慧力寺之忠上人取黃帝岐伯

所論及張仲景劉守真李東垣諸家書窮日夜讀  
之遂造其闢奧忠亦無以過之於是無貴賤貧富  
凡有疾者輒造請焉起人於阽危者數矣然一  
以利天下為心其施甚博而取於人者甚廉

王淵

輟耕錄字若水錢塘人善山水人物尤長於花  
竹翎毛幼時獲侍趙魏公故多得公指教珊瑚

網若水之畫天機溢發肖古而不泥古西湖遊覽  
志若水畫法兼綜古人無一筆院體山水師郭熙  
花鳥師黃荃人物師唐人  
而水墨花鳥竹石尤絕品

范思賢

徐一夔東臯隱者傳姓范氏名某以字行其先在宋時有為防禦使用醫小兒名思賢去

防禦五世傳其業益精居旁近人無貧與富有小兒疾輒趨思賢求醫其為醫務利人不務利於人名愈益顯所居錢塘城東其地平行有竹木禽魚之樂因稱曰東臯隱者

謹按萬厯杭州府志及聶心湯縣志皆言思賢姓吳名觀善其業傳自外家范氏但一夔去思賢較近謂為范姓應無可疑者故錄之

沈麟

成化杭州府志字秋澗杭人西湖遊覽志麟畫山水師郭熙兼能寫貌樹梢鷹爪松葉攢針山

多盤聳石作雲斂頗得郭家風度

明

陶華

名山藏字尚文餘杭人治病有奇效一人患病因食羊肉澁水結臆不可下又不能吐華曰可

食砒一錢人駭不用曰殺人者砒也華曰試之一服而吐人請所以華曰羊血能解砒毒羊肉得砒而吐而砒得羊肉則不能殺人是以前以可愈華於治傷寒尤精論者謂仲景以後一人兩湖塵談華深切脉理旁察病源隨症製方不拘古法每遇奇疾應手而痊一女子大冬昏悶不食欲狂咸莫測其症陶與之香薷飲一服而愈詢之此女因取三伏中所曝衣遂得疾蓋中暑也

吳恕

成化杭州府志字如心仁和人號蒙齋精於醫常謂張仲景傷寒論旨意幽深學者未易得其

要乃約為律賦以發其玄纂指掌圖開示學者世之醫學宗之

陳岳山

武林紀事仁和人居竹竿巷以星命為業得異人授以天文之術言事歷歷有驗一日與

隣老遊郊外欲回陳強之弗得云爾去必遭官杖  
其人不信偶冲郡守節級果遭杖入常見郭顏色  
門首豎旂欲為醮事陳曰此日不宜作醮道士云  
大奏已定不可改矣竟於是日行之後果遭官事  
岳山足跛性傲雖富貴人亦  
慢薄之終無求於人以貧死

### 祝海鶴

琴戩弘治間錢塘有祝海鶴惠祥  
高騰等造琴擅名一時人多珍之

### 張翺

西湖遊覽志仁和人精推步占候宣德間潘中  
丞將往南粵視師翺感知已強與行一日坐帳

中見片雲隱隱起離震間謂潘曰事濟矣有頃烈  
風南來此捷音也已而果然會潘欲疏薦翺逃去  
易名晦跡以終其身嘗賦詩云有意欲  
嘗千日酒無心去傍五侯烟蓋其志也

### 鄒觀

嘉靖臨安縣志臨安人精於醫術常有鳳亭貧  
民患疔毒請療之即愈其人以牛為謝辭勿受

越二年道經鳳亭夜遇虎人馬皆驚忽有牛自灌  
莽中逸出抵虎遂得免難後收者至詢之即前所  
療人所却之牛也

士夫聞而異之

### 葛林

名山藏字茂林錢塘人善小兒醫成化中充太  
醫院官武廟在裸一夕痾作夜分召林一匕而

安明日賜白金綵幣使與上公之宴汪比部有子  
患痘汪故知醫謂無害也林視其足底有泡結癥  
膚內曰吁百日哉百日果暴卒汪問故林曰夫痘  
構形之餘穢也纖芒未盡亦無生理是疾初發自  
腎而我知其不能暢是以必死既而流於足底以  
故發之緩而至百日也少師楊公子當暑而驚眩  
氣絕且移木矣林趨入曰無傷也亟出之楊曰兒  
已噤奈何劑也林曰無劑所恃者天上雲耳雲生  
而淒淒欲雨陰氣舒而陽鬱消吾以清利物煮水  
而蒸於下其可診乎如法而愈及暮兒復戲於庭



矣累官太醫院判壽八  
十八所著有杏塢祕訣

### 葉文齡

嘉靖仁和縣志字德徵仁和人以醫受知何  
陳二侍御起送禮部屢試優等例授冠帶供

職於聖濟殿除太醫院吏目召診保和有功陞御  
醫忽賜召對被溫旨御書忠愛額於堂再召對陞  
院判後因母老乞終養繼忠風  
疾致仕所著有醫學統旨行世

### 葉折手

七修類稿杭天順間褚堂有葉姓者左臂病  
風善奕棋高者下者俱可與之對局而局終

則必勝也四方能棋之士過杭尋與  
之奕終無一人能過者世稱葉折手

### 吳綬

兩浙名賢錄錢塘人著傷寒蘊要全書發明五  
運六氣畫圖立說究極玄微以名醫徵至京師

仕至太醫院院判比歸時湖墅有馮英者病傷寒  
一時諸醫議用承氣湯邀綬入視之曰將戰汗矣

非下症也當俟之  
頃刻果戰汗而解

**錢益**

獻徵錄字孟謙其先汴人後徙杭之錢塘世業  
顯顯常懸一金錢於門以故凡求治小兒者必

曰金錢錢氏云益性警敏早事舉子業遭家中落  
乃復習醫而顯顯術益臻其妙成化乙巳被召入  
太醫院陞御醫致仕歸錢塘常奉詔校正袖  
珍等方考據精當凡經其指授者率為良醫

**張崙**

萬厯杭州府志字景嵩仁和人五歲喪明十三  
受易凡卜筮星厯諸書入耳蘊心能了大義每

論人祿命壽夭窮達利鈍厯厯有奇驗遠近異之  
名山藏武宗南巡浙中備供帳甚至布政使徐蕃  
命崙筮得同人之離蕃曰同人親也離應南面駕  
其來矣崙曰不然卦體屬乾西北其位茲應返也  
主上至尊人安得同之又曰先號咷而後  
笑光之矣其在純乾之日乎悉如其言

俞橋

寧志備考海寧人少業儒究心理學兼精岐黃術嘉靖間以名醫被徵累官太醫院判橋於方

書無所不晰更博詢諸名家得河間潔古東垣未刻諸稿及古今諸家授受秘方斟酌損益之以治病無不奇驗居京師恥事權貴而貧家延之必盡心療治以故名愈盛而家日窘士大夫雅重之所著醫學大原一書蒐輯樞素以下諸家有闕病症藥脉者次以賦括令業醫之士診脉製方皆有所攷證焉

王賜爵

餘杭縣志字丹宇先世為宋御醫傳至爵世以醫顯爵為人治疾惟望色聽聲或以病狀相語聞病之陽論得其陰聞病之陰論得其陽藥至病痊

范叔明

畫髓元詮號元白錢塘人善繪事以右肱病廢專事左筆畫多宗董北苑黃大痴墨法纖

細更工花鳥蘭竹偶  
一濡毫便成名筆

**吳東升**

兩浙名賢錄杭州前衛百戶善楷書杭城十門并各公署皆其題額淨慈寺壁書南屏二

大字結構尤佳憲宗時負重名屬續  
前一日有詩戒子薄葬時人賞其達

**諸餘齡**

萬歷錢塘縣志字雲泉善書奕通醫家言而多新得四方爭迎致之晚隱靈鷲山每語客曰我中車馳城中起死人何得身為死人馳喪車出城乎當終於此與徐鏜輩諸名醫為天醫社

**陸壘山**

西湖遊覽志杭城假山稱江北陳家第一許銀家第二今皆廢矣獨洪靜夫家者最盛皆

工人陸氏所壘也堆塚峯巒拗折澗壑絕有天巧號陸壘山張靖之嘗贈陸壘山詩云出屋泉聲入戶山絕塵風致巧機關三峯景出虛無裏九仞功成指顧間靈鷲峯來羣玉塚峨眉截斷落星間方

洲歲晚平沙路今  
日溪山送客還

**戴進**

圖繪寶鑑字文進號靜庵又稱玉泉山人錢塘人山水得諸家之妙神像人物走獸花果翎毛

極其精緻喜作葡萄配以鈎勒竹蟹瓜草奇甚真畫流第一也兩浙名賢錄宣宗善畫一時待詔有謝廷循倪端石瑞李在皆海內名手及進入京衆工妬之一日仁智殿呈畫進以得意之筆首幅為秋江獨釣圖一紅衣人垂釣水次畫家惟傳紅色最難而進獨得古法入妙宣宗閱之廷循從旁奏曰此畫佳甚但恨野鄙耳紅品官服色也衣以釣魚殊失大體宣宗以為然遂揮去餘幅不復閱子泉字泉淵山水得家傳有氣韻武林紀事進之父夢畫師沈明遠入門是夕生進畫品絕世名冠天下

盧復

杭州府志字不遠習岐黃兼通大乘子之頤善療奇疾凡尸屢迴風投劑無不中臟結一症之

頤自以為發前人所未及舊浙江通志之頤著有仲景論本草乘雅金匱要畧論疏諸書行世

張文貴

筆牋杭人畫筆以文貴為首稱而文貴亦不妄傳人

嚴元

兩浙名賢錄字宗仁餘杭人少業儒不售從父耔謁選京師屬有詔選醫士元就試禮部授太

醫院吏目世宗命纂修袖珍諸方錄成賜銀幣甚渥世宗幸承天命元扈從居常宣詔診視及兩宮疾治輒效輒拜金綺賜至徹御前酒饌以優寵之九載考績授御醫為人所忌竟中蜚語落職

朱玩泉

武林紀事居太平門外善課命正德六年有花市朱氏子得疾甚劇父聞玩泉名往問子

病時三月半後也算其子難過八九月其父又以已命與之推托言親戚之命朱推云此人立夏日

死矣時去立夏止十數日耳父未之信歸以告其妻妻曰此妄言也已而皆如其言

**俞恩**

兩浙名賢錄字天錫錢塘人號江村居士善畫人物花鳥性質直疎野不喜治生描染移時輒

復中止故其畫雖佳而所傳不多子舜臣字治甫喜觀長流墨戲號海峯子工山水人物着色翎毛

花卉尤為精絕

**藍瑛**

舊浙江通志字田叔錢塘人少穎異八歲嘗從人廳事蘸灰畫地作山川雲物林麓峯巒咫尺

有萬里之勢及治經生家言指河圖洛書曰古人未有書先有圖圖何必不名家遂留意繪事皴染皆合古法其細描宮樣則界畫衣褶色色飛動過宋畫苑諸人

**姜師周**

圖繪寶鑑字周臣錢塘人善畫山水學宋石門下筆老健陰晴濃淡烟雲縹緲又善牡丹

鈞勒設色俱佳錢塘縣志周臣嘗遊京師時關仲  
通以畫名師事焉與同郡藍瑛各拈足練數丈相  
戒止寫獨樹高柯勿用竹石映帶嘗寫梧桐落筆  
數葉得秋風晨露之致見者以為神品為人深沉  
知大體魏忠賢枋國時師周與大金吾邢某善魏  
以鎮撫授邢將受旨起鍛鍊獄師周醉拍邢肩曰  
君不畏天道乎而輕為若是邢乃謝不受魏私人  
崔某欲得師周屏障為稱觴以他友名代求師周  
怒擲之地後以子圖南貴  
贈侍御自號花酒頭陀

何有

富陽縣志坊郭里人少讀書知文義為人迂古  
質直因讀易留心數學見康節梅花數玩月餘

忽有悟一日鴉鳴占之云夜主夫妻相爭見血已  
而更盡時僕夫與其妻鬪於室急往禁之已扑婦  
額流血因名曰老鴉數所占無不立應四明周茂  
桂館於周美家督學使者業行檄試寧波矣桂書



去字令占之曰字雖云去而畫直下筆鈎搭勿去也桂不之信又書壬字曰督學去任矣三日內即有徵必丁艱也至三日果然叩其故曰士上一撇是撇却士子去也督學任甫一年不可云陞政聲甚美未可云罷故知丁艱此斷以理也

## 國朝

**潘楫**

仁和縣志字碩甫號鄧林少以孝弟聞樂道不仕賣藥都市中人以韓伯休目之受業數百輩

治疾皆有奇效所著有醫燈續燄行世

**劉度**

錢塘縣志字叔憲錢塘人藍瑛弟子也深得瑛筆意後更變其法師大小李將軍畫樓臺約

縮人物細入毛髮而形像宛然然亦間及他家沒後遺墨雖寸縑片楮人皆奉以為寶

姚應鳳

杭州府志字繼元仁和人以瘍醫顯一叟患脹滿諸醫多云膈症應鳳曰此肺癰耳取一

大盂水向病者頂上傾之病者陡驚亟舉刀直刺心瀉膿血數碗而愈人問之曰人心下垂水潑而驚驚則心系提吾刀可入也一人身患痛左臂似有係之者應鳳曰君食內中鼠毒左臂生鼠懸刀擬之有鼠墜地而逸官太醫院院判

謝彬

仁和縣志字文侯上虞東村人隨父遊學至杭遂家焉少年從莆田曾波臣遊授寫真法凝眸

熟視得其意態所在濡毫點次眉目如生精彩殊勝彬身不滿五尺矍然而清目如點漆兼善畫山水及作漁家圖清超絕塵迥與時別人多珍之子廷璋能得其傳同時諸昇善畫竹橫斜曲直無一不可人意而雪竹尤佳遂稱獨步

王佑賢

舊浙江通志字聖翼錢塘人幼孤力學尤精方書濟人利物所得輒周貧乏巡按牟雲龍

薦辟不就懸壺自逸庭有古梅最愛之當事強移植官舍不活還而復榮人號返魂香樹後梅遭火

焚而佑賢亦卒子遵遜

輯有古梅軒燼餘集

沈好問

錢塘志鈔字裕生號啟明錢塘人世業小兒醫至好問益精尤善治痘症

張文啟

杭州府志字開之仁和人遊於張遂辰潘楫之門盡得其傳於古醫書無所不讀與同志

設惠民藥局創育嬰堂天醫院又請於當道建靖浪亭渡江者得免風波之厄

徐瑯

舊浙江通志字子山臨安人精於象緯六壬諸書居常戴麻布冠蹠蹠行市中夜則露坐山頂

以占候  
躔次

吳嗣昌

舊浙江通志字懋先仁和人世業醫總督趙廷臣遘危疾嗣昌獨排衆論投以冰水立愈

後瞽居河渚著傷寒正

宗醫學慧業等書行世

章谷

杭州府志字言在十餘歲從塾師學師出有友訪之羣兒忘其姓氏師怒谷即以筆畫其額

鬚眉栩栩然也師笑曰某也叩之果然及長善八分書其烘染尤工絕有至性母遘奇疾割股療之

范駮

池北偶談字文園善相人謂武進周清原吳江徐欽皆當不由科甲入翰林已未皆授檢討其

言良驗范海寧人驥字文白之弟也

閔自成

舊浙江通志字思樓豐寧坊人性孝友幼失所恃父喪明出入扶掖舉步不離精內外科

求治者日不暇給遇貧乏輒不受值且診視必先往曰倘後彼恐其慚慍必殆矣丐者盈門一一應

之不厭遠近  
翁然稱長者

任二琦

杭州府志號瑞庵姓韓氏宋忠獻公後裔扈

數傳至二琦技益精凡醫嬰兒投劑卽効遇貧者則袖金錢與之并貴藥不吝早失母事後母張惟謹子允謙懋謙皆世其業

馬更生

舊浙江通志字瑞雲錢塘人少學醫於婦翁

周某學成而未敢試周好奕有貴人疾革延周方奕令更生往一劑而愈自是名即大起嘗過舊府見一人暴死曰此可活啟其齒灌以藥立甦或望色聽聲於數年前預決人死期皆奇中

嘉興府

## 五代

陸晁

五代名畫補遺嘉禾人性疏逸好交尚氣每沉酒於酒亦善丹雘多畫村野人物凡酒興情逸

遇筆揮灑出於臨時畧不預構南唐李璟嘗聞晁名欲召之侍者謂晁好縱酒歌舞無臣子之禮璟由是疎遠之書畫譜晁善人物多畫道像星辰神仙等而又喜為數稱者如三仙四暢五老六逸七賢與山陰會仙五王避暑之類是也

## 宋

唐希雅

宣和畫譜嘉興人妙於畫竹作翎毛亦工始學李後主金錯刀書有一筆三過之法雖若

甚瘦而風神有餘晚年變而為

畫故顛掣三過處書法存焉

沈珪

春渚紀聞嘉禾人初因販繒往來黃山有教之為墨者以意用膠一出便有聲稱後又出意取

古松煤雜用脂漆淬燒之得烟極精黑名為漆烟每云韋仲將法止用五兩之膠至李氏渡江始用對膠而祕不傳為可恨一日與張處厚於居彥實家造墨而出灰池失早墨皆斷裂彥實以所用墨料精佳惜不忍棄遂蒸浸以出故膠再以新膠和之墨成其堅如玉石因悟對膠法每視烟料而煎膠膠成和煤無一滴多寡也故其墨銘云沈珪對膠十年如石一點如漆此最佳者也墨莊漫錄近世墨工多名手自潘谷陳瞻張谷名振一時之後又有嘉禾沈珪金華潘衡之徒製作精緻皆不媿人舊

李甲

萬歷嘉興府志字景元工畫作翎毛生動有奇趣東坡嘗題其畫曰郭恕先之後一人

曾之茂

峽州志號雪村海鹽人善畫梅竹寧宗朝任為郎

吳先生

夷堅志居崇德市中善易筮日惟一課鶉衣  
籊笠扁一屋於邸逼隣圓潤上穿下漏惟一

竹簣為牀下積敗瓶故覺蟲鼠遠走夏夏然風雪  
陰雨則終日閉戶得錢米衣肉共實一窟中時為  
人竊去不問也無錫戴士先母病孿不能行七八  
年矣百計求愈不得士先過崇德攜百錢訪之吳  
為揲卦卦成曰當得有道之士治之姑蘇杲道人  
不為勢利所誘君純孝往求必得如志然其人無  
定居當以百日為期日歷一巷尋覓庶可見士先  
喜持書抵蘇行求不倦僅五旬果逢杲道人投以  
書欣然至無錫為戴母診視數日即能移步母拔  
金釵謝之笑曰且寄夫人處他時要用當取之但  
館我於外足矣館之歲餘忽言曰我且死幸驚所  
寄釵以辦棺窆明日果死戴氏奉其教及將窆中



已空矣蓋

異人也

周堯敏

嘉興府志字禹卿號學山  
畫竹宗文湖州能臻其妙

王鼎

畫髓元詮字德新海鹽人好寫竹學丁子  
知深悟筆意于秦之號竹趣亦能父學

元

張成

楊茂

尊生八箋嘉興府西塘楊滙有張成楊  
茂別紅最得名但硃薄而不堅者多輒

耕錄嘉興斜塘楊滙髹工鎗金鎗銀法凡器用什  
物先用黑漆為地以針刻畫或山水樹石或花竹  
翎毛或亭臺屋宇或人物故事一一完整然後用  
新羅漆若鎗金則調雌黃若鎗銀則調鉛粉日曬  
後角挑挑嵌所刻縫罅以金箔或銀箔依銀匠所  
用紙糊籠罩置金銀箔在內遂旋細切取鋪已施

漆上新綿指拭牢實但著漆者自然黏住其餘金銀都在綿上於熨斗中燒灰鍋內鎔銀渾不走失

**東谷子**

徐一夔推命解嘉興有東谷子者居春波門用五星躔度遲留伏逆法推人生年月日時

所值貴賤禍福毫分縷析無有不驗

**嚴子成**

萬厯嘉興府志字伯玉其父秋蟾自河南賣藥秀州遂家焉子成益精父術趙文敏遺疾

已殆子成診治翼日乃瘳文敏繪孫思邈圖以遺之

**薛如鑑**

馮李詩繫嘉興永安鄉人挾相術遊江湖一時名士多與交往楊廉夫高季迪皆有詩贈

之子月鑑孫鑑心白雲秋蟾皆能世其術

**彭君實**

格古要論嘉興人餞金山水人物亭觀花木鳥獸種種臻妙

盛懋

嘉興府圖記字子昭魏塘人父洪甫善畫懋世其家學而尤過之善山水人物花鳥始學陳仲

美精緻有餘特過於巧時以吳仲圭墨竹丘彥高草書章文茂筆及懋山水稱武塘四絕

朱華玉

輟耕錄嘉興魏塘人浙西銀工精於藝者池北偶談宋荔裳觀察藏有元人所造銀槎最

奇古腹有文曰至正壬寅吳門朱華玉甫製華玉號碧山萬厯嘉興府志碧山所製酒器極精妙如蝦杯蠲杯之類不施藥鐸注酒自能流走至今人珍之朱彝尊鴛鴦湖棹歌注碧山元時銀工也所製銀槎鑿張騫於上以七寶嵌之

明

梅玉

貝瓊贈星學梅生序居及山精五行之術其告人吉凶禍福咸可徵焉實賢而隱於卜筮者

**吳弘道**

正德嘉善縣志精於醫術洪武初仕太醫院御醫每療人疾無不愈者愈則各令種竹一

竿尋至鉅萬人

稱其地曰竹所

**韓履祥**

海鹽文獻志號抹芝海鹽人讀書能詩工畫洪武間受知高皇擢太醫院御醫成祖尤加

眷注公卿大夫莫不與交精於切脉雖無疾壯夫能隔歲斷其死期殆通神也四世孫本字克誠能

承其業

**張德剛**

萬曆嘉興府志嘉興縣西塘人父成善髹漆別紅器永樂中日本琉球購得之以獻於朝

成祖聞而召之時已沒德剛能繼其父隨召至京面試稱旨即授營繕所副賜宅復其家時有包亮

亦與德剛爭巧宣德時亦召為營繕所副

吳瓘

書畫譜字瑩之嘉興人多藏法書名畫能作窠  
石墨梅學楊補之頗有逸趣珊瑚網瓘畫寒雀

爪喙生動不

下錢玉潭

滕道軒

沈懋孝贈滕醫士序歲辛卯夏子女弟忽患  
寒熱一日沉瞑所迎醫或曰傷寒曰疫火或

又曰氣中又曰瘧也汗瀉雜投病益進七日幾絕  
亟走郡中迎道軒至至之夕瞑然木強已三日矣  
衆以為必不復生道軒按脉察形曰此症乃風入  
太陽痰迷心竅病名曰瘧靈樞論之詳矣其症尚  
當角弓反張其初必於產中受風邪入血脉數年  
始發先必曾微見顛眩之狀問其家乃知自產來  
月事閉痼者七年今歲三月忽自仆已而遽醒衆  
始信其言之確越宿反張之症見此時舌強齒噤  
藥不下咽則以牛黃硃砂等丸天麻南星菖陽等  
飲微從鼻孔進初亦拒不可入乃連日夕煮藥呷

下之僅涓滴滲漉耳治三日目始瞬七日口始微  
開手足始蠕動旬日外始能微出聲知疴瘥藥液  
可受於是內外姻交莫不驚喜走  
告謂道軒能起死一郡傳以為神

### 董仲敬

弘治嘉興府志善觀天文諳推步  
之法以術鳴任欽天監挈壺正

### 賀岳

海鹽文獻志字汝瞻少業儒因母病求醫醫無  
良乃束儒書盡購醫書誦之遂師澱川韓克誠

得脉法師武林胡翠巖得鍼法入西走吳得王維  
雍親炙王道等方東走越得曹靖之延之以歸日  
與講求始知醫無常師明理是師師無常術圓神  
為術若東垣之藥內傷仲景之藥外感河間之藥  
熱丹溪之藥痰會而通之得其要畧於是擇古今  
醫藥之既效者附以已見曰明醫會要猶以為未  
備也又博討而類摘之如制劑則有藥性藥鑑視  
疾則有脉法治法釋以先賢之總論徵以成效之

醫案凡男女嬰兒內外針灸纖悉畢備曰  
醫經大旨二書人爭傳誦之用輒得效

陳以誠

兩浙名賢錄嘉興人善詩畫尤精於醫永樂  
間應薦隸太醫院累從中使鄭和往西洋諸

國擢院

判歸

嚴樂善

舊浙江通志嘉興人業醫有名永樂癸巳理  
舊星湖市南有一男子造其室出金飾一器

跪而進之因附耳語未竟樂善擲金大詬且脅之  
曰我今不發汝隱汝若更求他醫殺汝同氣我必  
訟汝於官踰年男子感悟來謝是夜燈花光彩倍  
常發蓮花一朶有人形類菩薩坐蓮花中長二寸  
許隣里競觀達旦始滅吳太史為燈花記樂善能  
運氣凝神及子午按摩法年七十五卒殮後五日  
隣人有遇  
於西湖者

### 胡日章

海鹽縣圖經激所人少學祿命術遇異人海  
上授之訣因益精每作絕句詩判人一生事

無不驗與人言必依於孝友忠信有後母者尤諄  
切戒勉之蓋有道而隱於術者年九十餘卒其判  
虞氏女命云只愁水涸春歸早香冷簾櫳淡月黃  
後適董涓兩月而涓死以節終判沈氏命云年年  
空佩宜男草不見金盆浴鳳雛竟無子杭州一人  
問命判云自是豪華多樂事元宵燈下蹴鞦韆果  
於明年元夕止妻觀燈不從相毆縊死嘉興一人  
生二子戲水邊同日溺死其妻痛切亦自縊夫檢  
所批命帖有一雙紫燕入池塘紅  
粉佳人繞畫梁之句如是者甚多

### 唐宗祚

海鹽縣圖經左所人善傳神景泰間與日者  
胡日章隨都指揮脫綱征金華賊綱戰沒總

帥孫問日章曾算脫公命否曰命書在公篋中又  
以傳神屬宗祚曰已為脫公寫之矣孫取篋視命



書尅期一無所爽懸寫像於堂儼然  
如生孫泣而祭之二人名因以大振

### 陸道光

天啟平湖縣志字明賜父金精岐黃術濟人  
立效道光精幼科一兒食果多病脹氣急衆

醫罔效道光獨取桂麝瑞香三味為丸一服即愈  
衆醫問之曰獨不聞果得麝則落木得桂則枯瑞  
香為百花如乎一兒染奇疾四肢堅不可屈道光  
曰此非藥石能療另有術焉舉傘覆之點安息香  
繞牀四圍皆設爐焚沉檀衆咸以為笑兒即平復  
香少間疾又發隨屑沉香服之而瘳弟道光字賓  
賜晚亦精醫有陸  
氏金鏡錄行世

### 陳景初

海鹽縣圖經善繪事與錢塘戴文進同時筆  
法亦類之蒼老可愛孫鳳尤善李伯時白描

### 許敬

嘉興縣志字孟寅感化鄉人曾祖廷芝祖文達  
父景芳皆以醫名江南治口齒者許為之最敬

能世其業有聲宣德間院使蔣主善薦入內院英宗患喉風更數醫勿效勢增劇召敬進絳雪噙之

遂愈拜太醫院

御醫賜勅獎諭

**吳愛蕉**

紫桃軒雜綴嘉善布衣弘正間人畫法吳仲圭筆意

**朱端**

萬歷嘉興府志字克正海鹽衛後所人寫山水可方輞川海鹽縣圖經端於正德間以善畫直

仁智殿授指揮俸賜一樵圖書遂號一樵畫宗馬遠山石水口效呂紀時有曾和者乍浦所人亦以

善畫直仁智殿筆法甚高

**談時雍**

續見聞雜記嘉興人號繼巖世嬰兒醫術冠一時晨興遠近抱嬰兒至者不下三五十人

視畢無不與藥酬以藥

金大約十受二三焉

姚能

海鹽縣圖經字懋良號靜山善談論好吟詩精於醫理著傷寒家祕心法小兒正蒙藥性辨疑

諸書

胡瀚

正德嘉善縣志初名浚字元海陶莊人徙居魏塘賣卜於市言多奇中遊金陵寓神樂觀提點

姚一山偶失金杯酷責其徒胡占得剝之頤曰金在土中未亡也汝第從居西南隅掘下五寸則得矣如其言果得杯永樂八年一山薦之於上至京卜無不驗賜今名授欽天監漏刻博士上新作殿命之卜布算訖跪曰某月某日午時當燬上怒囚之以待至期倩獄卒占視返報曰午過矣無火胡服毒午時正二刻殿果焚上急召胡死矣甚惜之賜馳驛歸葬于四人吳昊昱昂皆棄占筮而學畫曾孫昂遂

以畫名

宋旭

馮李詩繁字初暘家石門號石門山人隆萬間布衣以丹青擅名於時層巒疊嶂邃壑幽林獨

造神逸海內競購之年七十有八莒上諸名流招致繪白雀寺壁一時妙絕圖繪寶鑑續纂旭山頭

樹木古拙巨幅

大障頗有氣勢

范摹

畫法年紀字行式嘉興人工山水人物畫史會要摹涉獵經史善歌詩多藝能凡金石款識篆

刻書畫之類皆能著其時代辨其真贋畫山水人物筆力瀟灑意趣幽遠

父珪

兩浙名賢錄字廷肅魏塘人精於醫治疾有奇驗一婦姪及八月臥不語衆醫斂手珪曰此內

經所謂胎瘕也十月當不藥自愈又有男子請診珪曰此疾不致死然脉無生理過三日當投劑期

內忽

溺死

**希道**

舊浙江通志嘉興僧深於養生之術有所療治擇用日辰不必藥餌嘗遇海州司馬韋敷見敷

鑷白鬚曰貧道為公擇日更之越五六日請鑷其半及生色若鰲凡三鑷之鬚不復變意其術出於

遁甲故自

稱希道云

**郁光始**

嘉善縣志字涵春嘉善人善醫不計利治病必先貧而後富先賤而後貴病家困苦者冬

施絮衣夏施蚊帳小兒險症賴以

全活者甚衆子國瑛能傳其業

**朱侏**

萬厯嘉興府志字廉夫嘉興人工字學考訂偏旁訛謬得六書旨精篆籀古文及漢唐隸法每

傲管夫人書七十二

篆金剛經人珍重之

**陸朝**

海鹽縣圖經鹽之世醫也其先有名麒者景泰間衛軍征沙寇以醫術療從行將士有功授醫

官子孫遂世其業朝尤深於內經本草切脉洞見  
病源決死生不爽然朝治病不欲遲於見功每至  
女子及癆瘵不即起者輒推引嚴漢漢用藥以和  
緩取效名亞於朝至今稱美良醫者必曰陸紹泉

嚴陵坡蓋兩

人別號也

王立本

弘治嘉興府志魏塘鎮人工畫山水人  
物師盛懋臨摹逼真子繼宗能世其業

朱儒

嘉禾徵獻錄字宗魯號東山其先吳江人以贅  
於秀水陳氏家焉年未弱冠貧不自存有浮屠

楊時升者教以醫術頗精其業後遊京師朱恭時  
為太醫院判引為族屬復精究其業久之授太醫  
院醫士遷吏目供事聖濟殿適大疫多所全活人  
有貧病者或以白金投劑中戒其家人曰必令自  
發病者得金喜因遂愈隱德甚多尋遷太醫院判  
一年遷院使神廟有疾召診奏言肝氣未平胃脉

微滯是以痰壅眩暈宜寬平以養氣安靜以益精  
上是之疾愈賜宴醫院舊浙江通志以子國祚貴

贈太子太

保大學士

趙麟素

舊嘉興府志海鹽人工畫正德間直仁  
智殿甚見重於時帶錦衣衛副千戶俸

魯得之

書畫譜字孔孫李太僕日華人  
室弟子工寫竹兼工歐顏書法

沈雪坡

林伯英

嘉興府圖記皆魏塘人雪坡善寫  
梅竹伯英工畫花鳥俱師樓觀

張紀

海鹽縣圖經字文正工畫士女衣褶倭髻與唐  
伯虎相上下而面龐肉色淺染三停用積粉法

三停謂額鼻頰此古

法也今畫家不知矣

石涵玉

秀水縣志字啟泰行術鹽官治痘症奇效西  
郊沈氏子方見痘延視辭曰此終不能有功

他醫療之過其門聞張樂則以痘愈酬醫也固邀  
入席呼子出揖以媿之涵玉曰明年今日不免於  
痢衆不悅已而果然一女患痘白色紅面如灑脂  
涵玉曰內潰不治症也取紙礮一令其父燃耳畔  
如雷大驚面部痘盡起數劑痘患少愈衆奇之問  
焉曰內潰通心竅為主驚則心竅開痘不內伏何  
足異子楮  
尤精先業

徐弘澤

舊浙江通志字春門春波里人所居當闌間  
與老衲逸民相往來為詩類元白畫出入子

久仲主間書法從吳興入門而尤愛張伯雨時稱  
三絕晚登峨嵋絕頂得山水之助歸而益工自號  
竹浪  
老人

陳璣

海鹽縣圖經字天器初受業陳景初後遊錢塘  
故家多藏進名跡由此入悟所繪山石雲樹各



成一家其寫照則面部鈞染生法衣紋皆後來所不及後有湯子英者傳其術往來茗中亦有名

張連

嘉興縣志字南垣少學畫得山水趣因以其意築園壘石有黃大癡梅道人筆意一時名稱籍

甚董其昌陳繼儒亟稱之若李工部之橫雲虞觀察之預園王奉常之樂郊錢宗伯之拂水園吳吏

部之竹亭徐司馬之漢槎樓皆其所作

高騰

舊浙江通志字九霄西塘人少識音律因父剛善琴通其譜後遊江湖愈知妙旨斲琴練絃郡

邑皆禮遇焉

沈子徹

桐鄉縣志居青鎮善磁壺文具與宜興時大彬同名至今士夫家有藏其手製者價值甚

貴

國朝

毛鳳翔

嘉興縣志字貞所善按脉識病源立起危症尤精於傷寒年二十即知名年九十九卒八

十年中活

人無算

徐真木

嘉興府志字士白書法宗鍾王工篆籀每書一幅人爭購之

曾鯨

桐鄉縣志字波臣其先閩人後居青鎮善丹青寫照妙入化工

張鳴岐

池北偶談嘉興人善製銅為爐知名海內

黃元吉

嘉興縣志錫工也所造茶具種種精巧其色與銀無辨海內咸珍異之

湖州府

### 三國吳

曹不興

西吳里語烏程人尚書故實謝赫云江左畫人曹不興運五十尺絹畫一像心敏手疾須臾立成頭面手足胸臆肩背無失尺度此其難也

惟不興能之歷代名畫記孫權使畫屏風誤落筆點素因就成蠅狀權疑其真以手彈之時稱吳有八絕張勃吳錄云八絕者菰城鄭姬善相劉敦善星象吳範善候風氣趙達善算嚴武善棋宋壽善占夢皇象善書曹不興善畫是八絕也廣博物志不興常於溪中見赤龍天矯波間因寫以獻孫皓皓賞激珍藏之南宋文帝時累月早暵取不興所畫龍置水傍應時得雨

### 晉

戴洋

晉書藝術傳字國流吳興長城人年十二病死五日而蘇說死時天使其為酒藏吏授符籙既而遣歸逢一老父謂之曰汝後當得道為貴人所識及長遂善風角好道術妙解占候卜數揚州刺史嘗問吉凶於洋荅曰熒惑入南斗八月有暴水九月當有客軍西南來如期果大水而石冰作亂冰既據揚州洋謂人曰視賊雲氣四月當破果如其言王導病召洋問之洋曰君侯本命在申金為土使之主而於申上石頭立冶火光照天此為金火相鑠水火相煎以故受害耳導即移居東府病遂差司馬颺為烏程令將赴職洋曰君宜深慎下吏颺後果坐吏免官洋又謂曰卿雖免官十一月當作郡加將軍至期為太山太守鎮武將軍颺賣宅將行洋止之曰君不得至當還不可無宅颺果為徐龕所逼不得之郡年八十餘卒所占驗者不可勝紀

姚信

舊浙江通志武康人精天文易數之學仕至太常卿造斯天文

南北朝

姚僧垣

北史藝術傳字法衛吳興武康人父菩提梁高平令嬰疾彌年乃留心醫藥僧垣年二十

四即傳家業仕梁為太醫正元帝平侯景召僧垣赴荊州帝有心胸病諸醫皆請用平藥僧垣曰脉洪實宜用大黃進湯訖果下宿食因愈魏軍克荊州僧垣隨至長安金州刺史伊婁穆以疾還京請僧垣省疾乃云自腰至臍似有三縛兩脚緩縱不復自持僧垣即為處湯三劑穆服之悉除樂平公竇集暴感風疾精神昏亂無所覺知醫先視者皆云已不可救僧垣後至曰困矣終當不死為合湯散所患即瘳隋開皇三年卒年八十五僧垣醫術高妙前後效驗不可勝紀聲譽既盛遠聞邊服至

於諸蕃外域咸請託之乃參校  
徵效者為集驗方十二卷行世

唐

朱審

歷代名畫記吳興人工畫山水深沉瓌壯險黑  
磊落端瀨激人平遠極目唐朝名畫錄審得山

水之妙自江湖至京師壁障卷軸家藏戶珍又唐  
安寺講堂西壁最其得意其峻極之狀重深之妙  
潭色若澄石文似裂岳聳筆下雲起楮端咫尺之  
地溪谷幽邃松篁交加雲雨暗淡雖出前賢之胸  
臆實為後代  
之楷模也

宋

牧羊子

癸辛雜識湖州卜者識章文莊於未遇時及  
仕再筮皆不許其得祿果連丁艱既而曰今

可仕矣且不在外遂由掌故以致兩地又常語醫者李重父曰君當飯於省中鄉人傳以為笑後文莊貴常招之診脉留與共飯於省閣因舉舊語一笑

**景歲**

吳越備史吳興人能言休咎以紙大書台字以貽裴充庭不旬日果貶台州刺史

**王克明**

葉適王克明墓誌字彥昭家烏鎮生乏乳以粥餌活遂得脾胃疾長益甚醫以為不可治

克明因自讀難經素問用意處藥夙病盡瘳始以其術行遊江淮常數千百里赴人之急鄉大夫皆自屈與遊其鍼灸尤精有難知者必沉思得其要然後與藥則無不驗矣魏安行妻風痿十年不起林克明施鍼而步履復初廬守王安道中風喋不語旬日他醫莫知所為克明曰此非湯劑之所及也令熾炭燒地灑藥輿安道其上藥氣薰蒸須臾而蘇累官翰林醫痊賜金紫

楊振

墨史字聲伯長興人蓄古墨最  
富多精品故所製不下趙彥先

馮生

清容居士集咸淳間湖州筆工馮生製筆得截  
法圓不至軟媚勁不至峭直一筆可作萬字

錢選

格古要論字彛舉號玉潭霅川人理宗景定間  
鄉貢進士善畫人物山水花竹翎毛師趙昌青

綠山水師趙千里尤善折枝其得意者自賦詩題  
其上許白雲集選嗜酒酒不醉不能畫然絕醉不  
可畫矣惟將醉時心手調和是其畫趣畫成亦不  
暇計較往往為好事者持去今人有圖記精明又  
旁附謬詩猥札者蓋贗本非親作也石塘文稿彛  
舉畫高者至與古人無辨常借人白鷹圖夜臨摹  
裝潢翌日以臨本歸之主人弗覺也湖之人經彛  
舉指授類皆以能畫稱珊瑚網彛舉多寫人物花  
鳥故所圖山水當世罕傳容臺集彛舉山  
水師趙令穰人物師李伯時皆稱具體



俞澂

竹泠字子清吳興人作竹石  
得文蘇二公筆意清潤可愛

元

唐棣

玉山草堂雅集字子華吳興人由茂才為吳江  
令精繪事嘗畫嘉熙殿壁為上所知六研齋筆

記于華學畫於趙松雪  
得其筆潤森鬱之趣

張文樞

兩浙名賢錄字石隱德清人畫山水師巨然  
筆墨簡遠咫尺有千里之趣時烏程胡欽亮

徐士元歸安孟玉澗莫  
廷賜俱以畫名一時

馮應科

西吳枝乘吳興人毛穎之技  
甲天下至與子昂舜舉並名

明

陸繼翁

王古用

格古要論筆最得名皆湖州人

沈淵鑑

弘治湖州府志烏程人少失明遇異人授範圍數推卜有奇驗

施文用

戒庵漫筆吳興筆工弘治時造筆進御有細刻小標記云筆匠施阿牛孝宗見而鄙其名

內傳以小名對勅  
易名曰施文用

小賀

張鳳翼小賀傳名思字子霑姓陸氏其父烏鎮酒家也燕良工賀四者偶之烏鎮客酒家左巨

室王氏因多購檀梨烏木象齒犀角諸材留賀四作卮孟罌缶諸器恩時時過王氏觀賀四作歸以小材效作示賀四賀四奇之欲乞為弟子而父母勿許居無何崇德葉氏馳一力邀賀四賀四意非酒家兒俱往不可乃以情懇陸翁媪必欲得兒俱往且許罄其藝授之恩亦欣然請行乃遣之俱至

葉氏凡工作圓者觚者圓而觚觚而圓者非思莫與成而思得心應手出入規矩中巧每越賀四上蓋青出於藍矣賀四死思喪之如所生賀媪顧自有子恩亦時時護其緩急又時時以所得金饋陸翁媪蓋一身而仰事者  
兩家焉殆孝義人也

### 關思

書畫譜字何思號虛白烏程人善畫骨法筆韻入二李三王之微萬歷間與宋旭齊名畫髓元詮虛白遠摹荆浩闕全董北苑梅道人王叔明近做沈石田等筆法頗能亂真復探吐故納新之秘篆刻詩字舉臻妙境圖繪寶

鑑關思一名九思字仲通

### 凌漢章

碧里雜存湖州人成化間鍼術神靈擅名吳浙兩浙名賢錄漢章為人慷慨負義氣見人之病如痛在身有迎者雖昏夜風雨無不疾赴砭石所投諸患脫然每晨啟門輿疾求治者日數十

百人貧者未嘗受直故身死之日家無餘資至  
今以鍼灸行者皆稱漢章弟子然術多不逮矣

周濟

萬歷湖州府志歸安人精於醫業療病無  
不奇中治傷寒尤驗雅好文墨馳譽浙中

臧相友

池北偶談長興人少逢異人授以一卷書中  
有劍術臧得其傳海鹽陸辛齋云嘗見其劍

合乃以雷擊木雕成有  
鐵丸二即雌雄劍也

國朝

張道岸

今世說字懸渡湖州人性嗜酒少進輒醉醉  
即喜畫蘭勃勃有生氣陸子黃嘗得所畫懸

之素壁忽發香滿室  
中因額其處曰蘭堂

寧波府

唐

陳藏器

本草綱目序例四明人以神農本經雖有陶蘇補集之說然遺沉尚多故別為序例一卷

拾遺六卷解紛三卷總曰本草拾遺其所著述博極羣書精覈物類訂繩謬誤搜羅幽隱自本草以來一人而已膚謏之士不察其該詳惟謂其僻怪宋人亦多刪削豈知天地品物無窮古今隱顯亦異用舍有時名稱或變豈可以一隅之見而遽譏多聞哉如辟虺雷海馬胡豆之類皆隱於昔而用於今仰天皮燈花敗扇之類皆萬家所用若非此書收載何從稽考

宋

日華子

本草綱目序例日華諸家本草宋開寶中明州人撰不著姓氏但云日華子大明序集諸

欽定四庫全書

浙江通志

卷一百九十六

三十四

家本草近世所用藥各以寒温性味華實蟲獸為類其言功用甚悉凡二十卷

### 臧中立

尚友錄毘陵人元豐間客鄞南湖抱病求療者日數十人中立診治如神崇寧中徽宗后

病甚詔求良醫中立應詔以布衣麻履見上命之入診出而問曰卿診得何症對曰臣所診脾脉極虛殆嘔泄之疾作楚和藥以進且曰服此得睡為效至夜半果思粥食不一月獲安賜歸詔出官帑市地築室南湖以居名迎風坊

### 陸暉

船窻夜話奉化人以醫術聞於時新昌徐氏為婦病產不遠二百里輿致之及門婦已死但胸

間猶微熱陸入視之良久曰此血悶也購紅花數十斤為大鍋以煮之候湯沸遂以三木桶盛湯於中取窻格藉婦人寢其上湯氣微又復進之有頃婦人指動半日遂蘇蓋以紅花能活血故也

元

俞竹心

輟耕錄術士俞竹心居慶元嗜酒落魄與人寡合順其意者即與推算醉筆如飛道已往

之事極驗時皆以為異人

呂復

戴良滄洲翁傳字元膺晚號滄洲翁其先自河東徙婺復自婺徙鄞遂家焉幼孤以母病攻岐

扁術遇三衢鄭禮之謹事之鄭有古先禁方及色脉藥論諸書具以授之復日記診籍於方藥驗否悉為參訂又若干年為人治病效無不神有廟祝楊天成女在室病五閱月腹如有妊延復治之復曰病非有異夢為鬼靈所憑耳女不荅趨入臥內密語其侍嫗曰我去夏追涼廟廡下薄暮遇黃衣神心動是夕夢一男子即我寢由是感疾醫言誠是也嫗以告復曰女面色乍赤乍白者鬼也脉乍

大乍小者崇也病與色脉符雖劇無苦乃以桃仁煎下血類猪肝者六七枚俱有竅如魚目病即已復之治病雖若不甚構思然其鈎取古法動中肯綮多類此所注有內經或問靈樞經脉箋切脉樞要運氣圖說養生雜言各若干卷

### 董筆潭

成化四明郡志奉化人少牧牛夜常夢筆浮潭上達旦往視之果得筆遂以筆潭名一日

見雙鷹止於巖石取筆狀之逼真由是寫鷹隼及驚濤古木皆絕倫至若鄞江方岫山之花果海錯王立本之花卉郭宗茂之水墨花鳥郭小山之水墨人馬皆稱絕品

### 明

### 吳國才

嘉靖寧波府志奉化白巖人悉心唐舉之術言屢巧中遠遊歸訪縣中故舊某不值其孫



開肆乃索紙筆為書械別而去某歸孫曰頃有吳  
與留書啟視之曰此吳國才先生也風鑿入神書  
中云相汝色汝婦當有粉骨碎身之災其慎之及  
期俾歸宴坐新室竟日不出抵暮食既至厨啟檻  
取水虎爪之入山以食門人袁廷玉嘗侍太宗一  
日問其受業之自以國才對召至試之果驗將寵  
賜以官國才以福  
薄辭亡何果卒

### 袁廷玉

戴良袁廷玉傳名珙以字行其先南昌人後  
家於鄞常遊普陀洛伽山有僧善相見而奇  
之謂其眼光如電法當以術顯因令仰視赤日待  
兩目盡眩潛布黑赤豆於暗處俾辨之又夜懸五  
彩絨線窻紙外使映月光別其色所試已昏中然  
後悉以相家之術授焉在鄞南臺大夫善化帖木  
兒由閩海道鄞見廷玉廷玉曰公神氣嚴肅舉動  
風生大貴驗也但印堂司空有赤氣到官一百四

十日當奪印然守正秉忠名垂後世願自勉普署  
台事於越果為張太尉逼取印綬抗節而死見江  
西憲副程徐曰君帝座上黃紫氣見千日內有二  
美除但冷笑無情非忠節相也徐於二年後拜兵  
部侍郎擢尚書後歸欵為吏部侍郎其術之精類  
如此廷玉常言吾每占人吉凶即知其心之善惡  
心善必吉其不善者反是以故因廷玉之言格心  
改行者至衆鴻猷錄姚廣孝至燕邸薦鄞人袁珙  
相術文皇帝使召之至令使者與飲於酒肆帝服  
衛士服偕衛士九人入肆珙趨拜帝前曰殿下何  
自輕如此帝陽不省曰我輩皆護衛校士也珙不  
對乃召入詳叩之珙稽首曰殿下異日太平天子  
也後果登大位列朝詩集傅長陵登極召拜為太  
常寺丞廷玉於九流百氏靡不涉究好歌詩人稱  
為柳莊  
先生

# 袁忠徹

涇林續記字靜思柳莊子能世其業相人富貴貧賤壽夭若燭照然與薛冲庵友善常主

其家見童子方垂髻持壺斟酒謂薛曰此童目下有大災三日內當就木矣可急遣歸薛素神其術即令起行童子回至半塗登厠拾白金五十兩久之一人疾奔而來入厠審視無有號泣仆地童前詰其故知宋千戶家奴所失也因問銀若干奴對相符出諸袖中還之奴喜邀與俱歸宋千戶曰拾銀不取誠哉好人即繼以為嗣荏苒三年宋死而童襲職童念薛舊恩冠服登門謁謝薛見之大訝問得顛末頗疑袁相術之疎招袁至留酌仍令童變服執壺以侍指示袁曰此即昔年童子也子謂逆死而今倖存何耶袁熟視曰此非爾奴乃五品一武弁也吾向見其面有死兆故云然今形容改易豈有陰德轉移其間乎薛笑述其事益服袁相術之神名山藏寧波衛人盛琦少役劉指揮家忠

徹過劉盛執扇旁立忠徹謂劉曰善視之進士知縣也琦後登進士仕無錫知縣分省人物考建文初文皇召問忠徹對曰天命有之無憂也獻人象大成書靖難後官尚寶少卿卒年八十三

### 楊尹銘

書畫譜鄞人永樂間以楷法進  
歷官中書舍人小篆師周伯琦

### 樓得達

兩浙名賢錄鄞人博文藝於奕則稱國手永樂初驛召至京偕江陰相子先入覲子先自

謂天下無敵視得達蔑如也上命二人對奕顧中貴官密取紙畫冠帶置局下得達屢勝遂啟局視之命吏部給冠帶焉

### 朱自方

畫法年紀號夢庵奉化人成化四明郡志自方性尚冲澹喜寫水墨山水晚年出入郭熙

范寬而自成一家同里卓民逸常師之而筆法精緻實有過焉婁穆中亦常師范寬而點染又在自

方之下在鄞則有胡仲厚吳景行之青綠山水師董源而雲氣悠揚可愛然亦自秘惜人罕得者如史均民之水仙傅子英之撫寫人物各有生意之數人者雖出處不同皆一時之傑出

**倪光**

鄞縣志字應奎少受易時時沈玩先天忽朗然內覺若有神授自知不良於功名遂悉棄去觀

消息盈虛輒能前知遨遊兩京名動諸公卿皆爭致說易一日在楊公文懿所忽中貴使至光見一雀自庭樹集於地已復還集樹即謂其使曰汝來得非失馬乎六日當復使大驚文懿問故光曰雀踴躍物也去樹而集於地舍所依也已還集樹復歸其所也其集樹也自北而南水數六也故曰馬失而六日復因復問馬色光曰以北水尅南火當黃而近於黑皆悉驗人咸以小康節呼之後閣老萬安欲薦官之光遽辭歸旋宿臨清中夜聞扣戶聲棘而辭哀光厲聲曰汝作歹將丐生耶其人吐

實光謾曰南北東西皆汝路也旦起市已獲盜有產子者至而傘裂其人失色光曰傘裂而小人見汝細君已育子可喜矣年八十生而舉孳擬淵明自祭杜牧志墓事為詩自挽其達生委命如此人皆稱為味易先生所著有味易詩集凡十二卷

### 高陽

畫史會要字秋甫四明人善花鳥畫石極精如太湖錦川英石蠟石皆妙形似

### 胡宏

異林字任之寧波人少讀易遇一道人語曰我有祕術子可受之但不營仕乃可免禍耳宏謹

受教遂以卜筮授之發無不中兩浙名賢錄嘗有士人應試書串字宏云君不惟中舉兼中進士串字者二中也別一士聞其語亦書串字以問宏云君且勿言科名當憂疾病其後二人一連捷一得重疾幾不起或曰所問者字同而吉凶何以相反宏曰問者出於偶爾從而效之則有心矣串下加

心故應得患也常  
著筮書曰黃金尺

張德輝

萬歷慈谿縣志字秋蟾號雲巢老人世居邑之姜壘成化四明郡志少學寫龍自得其趣

晚年烘染有法而飛雲驚電變化萬狀或累日不下一筆或一日連寫數幅自有神妙

徐詵

成化四明郡志字和仲其先錢塘人曾祖字號雪汀父夢吉號曉山皆業儒善琴後父宦遊四

明遂家焉詵性謹厚居家篤學以春秋經教授鄉里出其講下者多繩繩有師法為文章不俚不浮亦以琴著名於時洪武間太宗在潛邸遣使召至錫賚殊厚既歸舉明經為邑庠訓導詵世以琴名而詵尤工得心應手趣自天成同里若王禮金應隆吳以介親受業其門遠近從學者亦衆後子孫皆能踵其家學而浙操至今稱徐門云

范瑱

鄞縣志字行甫號墨逸工松兼翎毛草蟲春草蘭竹菖蒲清逸可愛嘗畫春草冬日展觀於庭

蜂蝶

並集

趙備

鄞縣志號湘南善寫竹縱橫雄逸迥出一時馬指揮斯臧領漕運北上乞備寫萬竿烟雨圖以

奉要路得者大喜遂擢斯臧督運其為世所珍愛如此兼工諸種花卉題詩亦饒風致

王毓

聞見類纂字用賢鄞人寫梅法王元章號香雪坡每寫梅一幅咏詩一篇遊錢塘無識者於城

隍廟肆筆焉題詩云行盡錢塘數十家無人為我煮新茶一襟清思難消遣吐出胸中萬樹花

呂紀

兩浙名賢錄字廷振鄞人精於藻繪時綴小詩其上初學邊景昭花鳥袁忠徹見之謂出景昭

代嘗戲畫雌雞壁間而生雄谷谷繞其側勿去殆上館於家使臨唐宋以來名畫遂入妙品獨步當



古點睛之流孝廟時召至京師官錦衣衛指揮同  
知其任畫院凡應詔承制多立意進規孝廟稱之  
曰工執藝事以諫呂紀有焉鄞縣志紀從子高字  
崇岳號松石翁棠字德芳號竹村翎毛花石皆得  
家學從學於紀者蕭增字益之隨紀赴京得其用  
墨之妙佳者與師無辨官錦衣千戶劉俊字克美  
陸鏐字守重號古  
愚筆墨俱能入室

王諤

兩浙名賢錄字廷直奉化人工畫嘗師里人蕭  
鳳盡其術乃肆力於唐宋以來諸名家凡奇山

怪石古木驚湍之類盡摹其妙孝宗朝大承寵倖  
時上好馬遠畫亟稱曰王諤今之馬遠也同邑盧

鎮常師諤

亦稱絕藝

幕講僧

舊浙江通志不知何許人初來鄞善堪輿術  
無不奇驗邑中大家宦族先世墳墓多出其

手久而益神所著書絕無刻本後人多托僧祕傳不知其術已不傳矣

**趙九成**

嘉靖寧波府志鄭人為郡學諸生以棋遊京師盡一時棋士對局皆屈焉孝宗御燕殿召

九成試之果雁流輩所行算多出古棋譜外上曰真國手也命官鴻臚序班供御

**李麟**

**李驥**

鄭縣志麟字次公精於人物及畫牛自署龍眠後身中年好釋氏禮紫柏為師

遂專畫佛像其所題偈多有警悟四方寶之弟驥字次德藝與兄琦亦師紫柏常渡錢塘負擔者攬其行李而去跡之無所乃想其貌而圖之揭於通衢其同侶見而笑曰此某人也遂偕詣負擔家行李悉在一時聞者絕倒從子芻字芳叔所畫得麟傳

**陳淳**

天啟慈谿縣志字子平隨父鏐任銅鼓遇異人授岐黃術能以靈心運古法不拘拘刀圭當意

到處眼前一草一木拈用之沉疴立起  
貧而修謝者輒却之人稱杏林先生

王養蒙

畫史會要鄞人畫葡萄障乘醉著新草履漬  
墨亂步絹上就以為葉布藤綴實天趣自然

鄞縣志養蒙

一作養明

趙獻可

寧波府志字養葵自號醫巫閭子鄞人好學  
淹貫尤善於易兼精醫其醫以養火為主嘗

論命門乃人身之主養身者既不知搏節致戕此  
火以至於病治病者復不知培養此火反用寒涼  
以滅之安問其生著醫貫一書為醫家指南後遊  
秦晉著述甚多有內經鈔素問註及經絡考正脉  
論二朱一例諸書子貞  
觀字如葵亦精於醫

鍾大延

寧波府志字恒國本江右仕族後為鄞人精  
醫治病不執恒方嘗言今人但知醫病不知

醫人病固有淺深人自有強弱豈得因病執方有二人同時病痲其一用補劑一用攻劑或問之曰此稟弱須補其正氣而後攻之彼體強故祇用攻耳徐大理病小便祕腫脹面赤發喘衆醫皆從熱症治大延視之曰是無火也急煎附子湯一服而愈一貴家孕婦病亦如之衆醫莫效大延曰是可勿藥也乃胎厯膀胱耳令其周身轉運而瘳一寺僧嗜鹽每食舐許衆醫雖知其為蟲然服藥輒痛悶欲絕大延曰是蟲不受藥也當有以餌之以鹽筍乾用藥煮仍加以鹽令服越數日果嘔蟲數升許而愈其用藥出新意多奇效皆此類

**李奎**

寧波府志字石梁鄞人精於醫洞究內外經心揣手追盡得其妙善起人痼疾有誤吞指爪喉梗幾殆奎令剪人指爪燬服之立愈或疑為古方奎曰不然此內經所謂衰之以屬者也聞者數服

# 王坡

兩浙名賢錄鄞人病瞽善六壬兼釋易繇至武林有驛傍人占家宅坡云今年四月十三日當

雷震堂棟不傷人後果驗鄞斷塘有一祠初塑神像成鄉人托以人名占之坡曰此人如木偶難逃水火越期果為惡少投於江隨潮上下後復取而燬之按察使僉事黃譽性嚴重人莫敢近招坡筮之坡曰似得鬼責公前歸時失展先大夫墓有陰譴黃下淚曰然坡曰明年當轉官在本省藩職後果如其言

# 毛來賓

鄞縣志號岐陽多巧思善製沙漏大者盈尺小者僅數寸以定晷刻無毫髮爽者邂逅一

僧異其術以重賄求授不許因以追魂法易之其法於密室之中潔壇玷薦牲牲香紙置繪具几上閱四十九晝夜能令神將驅攝亡魂追摹形貌無不肖肖來賓得其術未嘗輕試偶之雪川於閩太

宰家繪其先父母像見者驚猶生會謝行人于宣  
死於流寇之變其父太僕延來賓追攝乃置壇如  
其法及期而素箋十幅細書皆滿凡生平履歷家  
事瑣屑童僕勤惰以至父母妻子間語有人所不  
可得知者無不縷縷曲盡其神異如此後懼  
役使鬼神遺子孫禍取書焚之其術遂不傳



浙江通志卷一百九十六